



梅山集  
十六

墓碣銘

廿七

~ 16  
2373  
19



和  
2873  
28-19



梅山先生文集卷之三十五



墓碣銘

內舅紫閣山人墓碣銘

并序 〇辛卯

嗚呼此紫閣山人朴公衣履之藏公嘗占魁科立于朝矣不以官稱而稱號者以畢生立德之在茲也公陰城人諱聲漢字士章系出羅祖羅麗之際名德輩出入我朝吏曹判書忠愍公諱淳用子母馬感太祖意竟回鑾然公則不免夫人任氏子叅判諱昕俱殉公死并旌三節叅判生諱叔達舍人贈叅議至曾孫諱淵薦學行直拜縣監縣監有子諱有

寧舉遺逸拜執義是爲公六世祖也會祖諱聖龜進士祖諱廷琬 贈持平持平公舉二男長諱亮欽號知足堂醇德惇行爲世模楷次進士諱長欽知堂公聘海州鄭氏運徽女生公進士公聘恩津宋氏必休女文化柳氏喆模女俱無子取公爲后公蚤治博士業已酉中生員辛酉擢相製攝堂后調槐院別檢于孝陵典籍于國子郎于騎省選授司諫院正言司憲府持平止于獻納辛巳十一月五日考終于長興洞第距其生癸未正月二十五日爲五十九歲以翌年正月葬于揚州九井里甲坐之原元配延日鄭氏錫

燠之女耐葬于左繼配河東鄭氏肅霖之女舉一男來五出爲伯氏後繼子來教來五男承赫來教繼子民赫二女適李種信韓胤錫公生稟粹美孝友天植八歲喪知堂公持制如成人事所后考妣克敬克謹柳夫人下從哀毀幾滅性每攀丹柩而泣忠養鄭孺人躬服食寒煖秤水廁踰凡所欲所愛無事難易人貴賤必先意承順存撫爲祖先修墓豎碣施于外親彌遠而彌殫其誠奉伯氏如嚴父憫其崇飲常泣諫或爲文仰勉丘嫂性嚴公夙宵洞屬務適其心竟底感化物然無間言護恤姪女逾已出及嫁竭家財資

裝或言其濫則曰先兄一塊肉敢言過乎事諸姑諸  
姊尤篤摯或致養室中以終天年推及宗族故舊不  
問親疎各厭其意有可教者延于家塾恩育德誨各  
遂其才門屏常多遠客屢寫紛錯性愛施趨人之急  
甚已之私中歲家益落或覓債以應之汲汲如不及  
常云調絲品竹固雅致不如活一填壑人闖車駢駟  
固盛會不如親一讀書士惘惘款款與人任真開懷  
傾倒兩忘所趨雅癖佳山水翛然遐舉浮游塵埃之  
外秉心骀儻釋褐二十年一步不枉居恒杜門影響  
俱息或勸公毋自高公笑言邯鄲之步徒失其舊何

能蹶跚蹙蹙受人口氣爲我人以故不悅坎壈終身  
亦無幾微色扁其窩曰無營賦梅花詩以見志嗚呼  
公豐幹長身面如冠玉重厚而樂愷和易而強確外  
溫而內莊言遜而志亢日用動靜純然一出於真羣  
行焯焯未可一二舉而皆無所爲而爲也俾公得志  
庶可以托六尺寄百里臨大節而不可奪豈不誠君  
子人哉公受學于族父立菴公俊欽已知有求仁一  
事常恨早孤承家靡遑讀書用充其志業雖曰未學  
吾必謂之學惟公可以當之俞著菴漢雋曰實德實  
行世儒疇敢及者君子以爲知言直弼被養于外王

母因奉教于公夙知有真用心處即公賜耳公不以  
我顯蒙相許爲知己而皓首無成辜負仁恩非直切  
西門扣策之悲也公晚而樹屋峒陰山中要與同歸  
未及攀藹軸而公遽歿矣精靈奕奕在林壑間而風  
流不可復見嗚呼悲夫銘曰

繫公篤行肇自忠愍一門三綱咸以身殉克紹以孝  
世世爲準至公而著厥聲方振天衢雲路信步則晉  
舖糟啜醢非我息存遠世自臧其樂斯真峒陰清冷  
紫閣嶙峋養晦其中抗志穹旻詎欲果忘聊以守身  
身與名完是爲道伸奚其爲政一家興仁皇皇急難

如救溺焚麟心龜德在古藝倫靈芝醴泉自有根源  
德厚流光不顯其門龍馬之山若堂其瑩獨葆其全  
歸于九鼓矢辭不諛姊子述銘

成均學正洪君墓碣銘

并序○壬辰

吾宗唐城府院君康敬公諱彬顯名于勝朝厥有成  
績紀于旂常康敬玄孫淳入本朝封益州伯後有  
諱啓宗龍蛇之役率門徒赴龍灣扈衛行在克著  
忠勤錄扈聖勳贈司僕寺正四傳至贈叅議諱  
夏績始居江西叅議有孫諱景祖景祖之子諱履一  
叅奉叅奉娶安東權氏舉君君諱龍圭字正中壬子

中生員癸酉以崇靈殿參奉登癸酉增廣文科丙科  
學正于國子奉事于太常以 當寧丙子十一月十  
二日卒距其生丁亥爲五十歲葬于龍岡石泉山辛  
坐君性於孝臨事而敢耻其不逮儉約爲度而施與  
如不及庀人嫁娶喪葬猶恐後時純純常常不自顧  
計辛未關西大飢捐累千金活死命者萬數時清北  
告警公以賊起於同省憤惋灑泣募兵數百人犒牛  
數十頭納于大陣是亦述先祖也好讀書博涉羣經  
而尤長於禮學洞究象數之蘊趨勸之妙推以教人  
愛才如渴且有鑑識因材而篤用就其器業及歿一

鄉匍匐如喪親戚至葬致客數郡苟不固取與然諾  
言信行果者孰能與此哉君齊平昌李氏男鎮齊女  
適金龍周鎮齊男顯洙鎮齊亦克豕一方倚重如君  
焉君從祖弟瑞圭乞君墓銘余靡足以不朽人者然  
竊感康敬之垂裕後昆至君而聞且君之好氣義排  
患急難非要有待而自見卽誠壹之所致斯無愧爲  
康敬之肖孫也歟是爲銘銘曰  
五旬非壽一第非顯其顯且壽亶在好善好善維何  
盡已自勉詎若世人梘蠟虛銜莫云天翁報施斯外  
藏仁賚後子孫昌衍吾與之銘用詔遐緬

司憲府監察朴君墓碣銘

并序○甲午

老洲吳先生講道南湖上四方學者多從之遊朴君季立亦贊書講業與聞性道之蘊言下怡渙一變舊見曰幾虛度一生先生謂其敏而有勇館穀而施教季立輒先譽鬢握衣執經而前反復叩質不明不措傳習而數後進壹遵其丈尺焉先生勉推其所知導迪北士用盡成已成物之功及歿爲隧銘悼惜其未就是足以徵季立也君諱命壁季立其字也系出寧海鼻祖寧海伯諱堤上死於忠至兵曹判書諱季孫又以忠遁世自靖卽君十世祖也曾祖諱泰漳 淑

陵叅奉祖諱萬棟同知中樞府事考諱師燮義禁府都事娶全州朱萬極之女舉君癸亥成進士丙子筮仕爲 義陵叅奉用修 陵勞陞通禮院引儀轉司憲府監察庚辰丁內艱進取非君素志而爲親屈也卒喪不復仕以風樹不待爲終身慟以丁亥三月二十二日卒距其生癸巳爲五十五歲葬于文川郡東九美鄉辰坐配清州韓氏洙女舉三男二女文鈔文鏌文鑑仲季歿女適康弘烈文鈔男寅祿君性於孝至誠服勤怡愉順志家極貧菽水屢空躬樵爨以養親葬祭以禮哀敬并摯鄉黨稱孝子幼而朗慧絕倫

少長喜學學羣經幾通最濳於四子書篤信聖哲勵志求道至忘其寒饑獨棲絕頂蕭寺攻苦食淡以肄課業每言得靜專之功爲多常嫌窮鄉寡陋請益于心齋宋公公名其室曰習齋又質所學于近齋朴先生編文并世諸賢揚挖其同異於是見聞漸博息索益通卒就正老洲而醇如也每歎理義無窮年數不足誦貫前聖之文縑櫛後儒之言手劄成帙窮晝夜罔倦有問者輒披心提耳不以親疎而有間善講說纒纒可聽篤於故舊樂道人善恥言人過盡其在己而不求人之盡乎我也以故爲一路所尊信焉北關

之學殿松巖而作者亦有聞焉而皆靡所取裁故得其門者嚮矣至君而門路克正晚年名理卓然可述南方學者亦鮮能或先豈不誠豪傑之士哉君弱冠遊京師館余室相守居業往往閱歲而歸洞徹心肝四十年如一日臨終馳書爲訣恨其生不及論著歿無可告語每執書而泣涕入九冥矣君兄子文鏞具狀而徼牲石之銘余嘗銘君父子而支離不死又銘君墓于人世何如也銘曰

朴顯羅世雙節成仁靖獻 莊陵曰有逋臣潛德雲林流光後人偉歟季立克胚先烈仁孝爲性英慧成



質濟以好學敦本踏實豈若世儒口耳是悅晚承眞傳式克踐述不敢信已是以臧闡釋微言其書盈箱庶幾藉手倡道一方陶鑄髦士永世開荒曷爲齊志脫屣斯忙琉岫峨峨錦水湯湯休各與齊愈遠彌長鴻筆誌隧繫君宗師是用不朽可當鼎彝我述不作亦無愧辭

仁村趙公墓碣銘

并序 ○庚子

莊陵癸酉吏曹叅議趙公順生與皇甫忠定公仁金忠翼公宗瑞并罹于禍至 健陵辛亥追錄死事諸臣與忠定公子錫忠翼公子承珪俱設壇享于 莊

陵之側趙公胤子兵曹正郎諱銘坐孥謫錦山久之量移木川公自嬰酷禍號絕幾不全及居木宅于細城山下陟屋後高峯東向拜南向哭日以爲恒蓋莊寢在越而叅議公受後 命于固城也距數里有岡巒壁立者公每朔望登其頂公服拜跪如朝禮吞聲飲泣竟夕而返婦孺樵牧皆指點其所名其峯曰正郎臺曰望京所居村曰多仁仍稱公爲仁村先生公毀瘠殉墓于正郎峯下負震之原後二百餘年而端廟復位又九十餘年而叅議公配侑焉 純宗壬申 贈公承政院都承旨木川章甫又俎豆公于忠

烈祠公之志節於是焉益章嗚呼晝昧于當時而炳  
煇于永世者是可驗天道之有定也公字警夫漢陽  
人出自高麗僉議中書諱之壽至諱仁沃吏曹判書  
忠靖公配食 太祖廟庭生知敦寧府事節孝公諱  
賚即叅議公祖禰也叅議公配原州元氏司正有容  
女公配懷德黃氏知中樞府事尚文女從 贈貞夫  
人附公墓男伯亨縣令縣令男璉大護軍公夙著文  
譽策名于 英陵盛際歷官至兵曹正郎曹失軍籍  
郎吏咸懼得罪公從容口呼遂完其簿既而得所失  
者無一孑駁異人皆驚服遇世禍罔究厥用俾其

曠世高才不少槩見惜哉 莊光之際賢士大夫皆  
死於忠忠臣之門又有三孝子金忠翼之子承珪河  
忠烈之子珣其一公也金河收孥而死公止於窟故  
無死然含冤茹痛以致滅性以靖獻于 君親者視  
被禍而死又加難矣屈於近而伸於遠原始要終靡  
有餘憾何差殊於死生哉古語云孝實天經忠爲令  
德百行攸先一心靡忒公其庶幾乎公後孫允欽謁  
銘于不佞累辭而不得遂據淵泉洪公所述狀而敘  
之繼以銘曰

父死於忠子殉於孝惟其孝盡所以忠報心注東越

目斷南嶠臺擬採薇峯是攀栢其庶無愧二理同極  
城山可崩公名不泐

孝子龔翁任公墓碣銘

并序○辛丑

故掌令 贈吏曹叅判西齋任公死於忠其曾孫諱  
泰春又死於孝在家則孝在邦則忠其理一也故曰  
求忠臣必於孝子之門而孝子多出於忠臣之世是  
以君子尚其類也公字子仁自號龔翁生稟至性髻  
鬣不暫離親側出告反面如成人父母病皆刺指進  
血居憂毀瘠幾不全墓稍遠不以風雨寒暑而廢事  
繼妣如嚴父禮恭貌婉濼愛自著繼妣恒言純誠事

我真孝子也塚飾家奠克盡著存因心篤友與仲氏  
連床同被怡怡有春津之樂公年周甲謀考妣改葬  
時公病革仲氏請退期不許食素却藥強疾而莅之  
自盡誠力校心而後已事畢反哭氣息欲絕猶向廟  
起坐哽咽涕泣曰父母體魄幸得同穴死且瞑目托  
仲氏以後事俾効濂溪經紀喪葬而歿即辛未三月  
二日距舉緇纜三日也閏四月附葬于牙山中竹谷  
先塋戊戌遷于同縣星山甲辰又遷于竹谷壬坐公  
天資近道子諒而剛介遭家多難生產剝落或累日  
不舉火而無幾微色晚益固窮一芥不苟取鄉隣亦

莫知其屢空也雅不喜交遊雖平生久要貴顯則不  
通訊常養真一室翳塵盈几戶外之跡可數也晚謝  
舉業專精問學本之四書而會通於詩易窮格踐述  
有獨覺其真之妙雅言聖人之道由己及人自近達  
遠豈有不得於己而遽欲應物者乎玩繹各理老益  
慥慥不知年數之不足常不觀雜書貴讀老莊者曰  
是足以壞人心術何必舍經而攻異端乎是可驗造  
詣之正也公醇德範世內行肫摯固由資質之美而  
學問之功有不可誣焉公西河人高麗御史大夫諱  
樹爲初祖代有名德爲三韓望族至知中樞府事諱

弘望執義諱洞掌令諱徵夏二世以氣節風烈爲  
國朝名臣而掌令公疏辨 聖誣竟被奇禍掌令公  
生處士諱時九夙負重望而因世禍自靖處士公出  
後從叔父諱昌夏尸知樞公祀生諱信白亦以禍廢  
娶坡平尹氏 贈承旨東英女舉公卽 英宗二十  
七年十二月十六日也配連山徐氏漢城判尹靖翼  
公秉德女孝敬天植彌謹蘋藻居常鎮顯而不使公  
憂公之守約多賴內助云生先公二年歿後公八年  
葬附公墓左壽七十一舉二男三女男永模天模女  
適縣監金箕詢校理鄭度采尹曾烈孫憲祖憲商憲

益成夏鍾妻長房出憲晦憲明朴載緯李鍾綱妻次  
房出金壻男在獻衆奉在顯女權厚仁鄭壻女洪承  
謨尹壻男致成憲祖男興教餘幼公羣行焯焯可述  
而皆原於孝善事異類之親者古或有之而豈有如  
公之絕者至使繼妣哭公過哀畢生不忍忘不惟人  
無間言而已苟不通經研理達孝悌爲仁之義者亦  
何以與此於是無愧爲西齋公之孫而忠孝一致也  
公歿後三十一年辛丑湖右多士舉公行誼于朝  
旌其閭曰孝子之門公非可以一節成名而善觀人  
者亦足以蔽其全體也憲晦從我遊抱狀而乞銘愚

誦公家名義夙矣又服公至行不辭而爲之銘曰  
生芻一束如玉其人皓首研經塞兌守身理義悅心  
其樂斯真伯鸞苦節原憲清貧無悶無怨中以自珍  
何以致之由百行源尚其世類疇與爲倫各門肖子  
熙世逸民甲子一終反于玄宅我銘以貞用詔無垠

醉菊任公墓碣銘

并序○壬寅

昔陶淵明有醉石亦愛菊卓爲霜傑忘懷得失而故  
處士西河任公托神交於柴桑自號醉菊孰謂菊之  
愛陶後鮮有聞哉公諱天模字德叟西河氏以名義  
風節世家至知中樞府事諱弘望執義諱河掌令

贈叅判諱徵夏三世俱顯而掌令公死於忠是生諱  
時九爲從叔父諱昌夏後卽公會祖也祖諱信白考  
諱泰春皆因禍自廢妣連山徐氏判尹靖翼公秉德  
之女也公性於孝助伯氏供親或奉養于家而極其  
滋味及遭艱附身附棺罔不自辦畢生含恤哭諱如  
袒括回甲不許置酒持躬如處子罕踰山門性又剛  
方簡文遊在鄉黨恂恂不惡而嚴固竄到熟雖致屢  
空而不妄求貸少治博士業旋謝功令惟遵晦存身  
專精教子及疾革措置後事雍容整暇喻嗣子以喪  
祭從禮閉門斂跡就正有道明農自食仍麾婦女出

怡然而逝卽壬寅二月一日也去其生甲子一周始  
葬于牙山星山十月遷于靈仁山可藏谷午坐先兆  
也配南陽洪氏益和其考也舉二男二女男憲晦憲  
明女適朴載緯李鍾綱憲晦男萬教憲明男釋教敬  
鎮敏鎮敏鎮朴婚出也始掌令公疏陳辛壬義理洞  
辨 聖誣仍被奇禍公常痛先志莫暴而遺文束閣  
鳩財圖八梓且先公有至行顯于 朝而旌表未下  
公臨歿以二事囑爲至恨憲晦述公遺志二者俱  
舉人稱公純孝攸致也不佞竊附幽顯闡微之義爲  
公作壙誌憲晦又謁麗牲之文累辭一人再述之非

宐而其懇苦切力疾而書之曰南服之高蹈法家之  
拂士人無間乎月朝云爾銘曰  
人是菊耶菊是人耶不汲汲於富貴不戚戚於賤貧  
茲若人之倫同歸于懷葛之民

贈左承旨旺林李公墓碣銘

并序○甲辰

陶菴李先生講道寒泉四方之士盈門賢愚隨材皆  
獲其益而寔能服勤至死用盡事一之義者其惟故  
處士李公諱行祥乎公生稟異質未成童請業于先  
生先生見公容止凝重聳然異之以義利之辨誘掖  
激厲陶冶心志公遂專精問學有守死善道之願先

生嘗書贈公以莫負我三字曰爾若止一鄉善士是  
負我也又寫萬事一直甘白之質可以有爲等語以  
勉之公外若遲鈍而內蘊朗慧周旋函丈至誠服勞  
先生晚患風痺語澁凡係述作酬酢咸措諸指畫公  
獨喻其意昏夜睡熟從衣背上乍草而公則曰唯唯  
及傳寫靡所錯誤先生詩以贊美曰樂公訓語古雖  
有千載實踐惟見爾啞夫暗中書小字微君莫能通  
其意天爲陶菴生此子又云吾居鄉十九歲質直可  
望者惟李處士公履公字也既贈羣書又賜三  
經四書彌加推重及易簣獨公執燭致哀如孝子終

身不匱痛念恩義求道真切乃就泉食庵之南建書  
社揭先生真像月朔焚香春秋設講用寓江漢羹墻  
之慕又校整遺文竭盡神精卒就完本為師門効力  
靡極不至而苟涉非義必救正乃已沮遺集之私刊  
撤雷巖之擅享者是也君子曰陶翁之門得李處士  
而師道益尊信哉公延安人以唐中郎將茂為初祖  
入 本朝檇軒文康公講石亨德業文學為世名臣  
珪組奕世不須譜也至諱時尹教官 贈吏曹叅議  
諱益基翊衛 贈吏曹叅判諱華老襲封安昌君諱  
詰佐通德郎即公四世也先生嘗許通德公以秉志

不苟三娶平山申氏延日鄭氏昌原黃氏黃氏之考  
鏞也以 英宗元年乙巳正月三日舉公公守師訓  
畢生不應舉甲辰 健陵將丹儲嗣旁求經術士卿  
幸道臣多以公應薦授 光陵叅奉不就甲寅因壽  
秩陞僉樞庚申十二月二十九日卒翌年三月附葬  
于龍仁牛鳴洞先塋乙亥遷于其上丁坐夫人光山  
金氏附金氏泰升女也生先公三歲歿先公十四歲  
孝順周通克配公德一男延龜繼述家學先公卒二  
女兵使白海鎮士人成鳳默孫曰愚明惠明惠明應  
明惠明過房改名學愚今直長女安秉儼白婿繼子



能洙女李應謙皆府使成婿二子載萬載九女鄭淑  
公器量敦厚性度剛確儼然有不可犯之色而事親  
愉婉先意承順慈濟灌指血居內外艱冬不炕夏不  
簋毀瘠幾不全日展墓汛掃罔以風雨而曠也伯氏  
善病躬自調護及歿做石潭遺法率宗婦宗孫同居  
置祭田以贍祀事建別廟以奉祀主庶母性硬難化  
而公待之以誠卒底感服訓子孫御奴僕各適其宜  
門庭之內肅如朝廷恒居夙興整衣冠跪坐蔬糲不  
繼而晏如也蚤夜磨礪鑽研經旨到會心處三復不  
已尤用力於小學論語邵齡猶不廢程課汲汲如弗

及驗之於躬行必期凝合而無間至若辨性理心氣  
之同異有所受而見大意嘗病儒者不事下學而驚  
高遠不察身心而工辭令且云朝廷空躋儒者於榮  
班已是不誠而儒者贊揚無一事匡救者尤爲可羞  
也遂卷懷退藏身世兩忘而專於內修不務著述四  
時會村秀設社講教之以身故潛導之速如方圓應  
形焉學者稱旺林先生昔孔子有言參也曾惟魯也  
故其學誠篤浚造乎道公之腳踏實地任重而道遠  
者殆泉門之曾子歟真可謂不負先生矣華泉李公  
贊公曰惟其窮而不憊故志潔而守約質而無華故

實過而名遜行義不出於身家教迪只及於鄉隣卒  
不得行所學於當世則殆亦命也君子以爲知言  
純廟甲申大臣舉公德業請褒嘉 特贈承政院左  
承旨兼銜如例公孫學愚謁銘于不佞不佞自齟齬  
已悅服陶翁於門下羣賢誦慕公甚篤靡敢以癘病  
辭接筆而爲銘銘曰

有列寒泉天挺宗儒造我髦士爲型爲模旺林應時  
中兮趨隅我疾我徐惟其步趨匪膜伊髓匪積伊珠  
左右乾養無朝無晡心通指畫微言是數矢辭報賜  
至于舉扶惟一直字單傳之符蚤夜服膺分寸不渝

闕里之宗匪嗤匪愚晦身岷巖獨與道俱一鄉秋秋  
如禺如于流風逸韻與起薄夫有 贈自天賁于泉  
塗牛鳴之堂公寧其軀載揭石章我筆不諛凡百君  
子是傲是圖

明灘成公墓碣銘

并序○甲辰

神州之爲戎已二百年矣獨吾東華爲一片乾淨地  
而學士大夫安常狃舊不復知有忍痛舍冤迫不得  
已之義以余所聞其能以一身任大經卓然自立於  
瀕波之中至九死而靡悔者其惟昌寧成公揆憲乎  
公字仲一胄于高麗中尹諱仁輔有諱汝完侍中文

靖公諱石因左贊成靖平公仍父子崇顯傳緒蟬嫣  
至諱大壽舉遺逸不起 贈司憲府執義生諱希在  
同知中樞 贈左承旨生諱好正 贈戶曹參判卽  
公三世也參判公娶坡平尹氏彥成之女以 崇禎  
甲申後三年丁亥二月二十四日舉公于龍山里第  
英宗辛酉六月十六日卒壽九十五臨終預庇喪具  
既終異香滿室人以爲仙化云葬于圓塘宅后亥坐  
之原亦遺命也凡三娶豐川任氏生員昌立女鎮川  
宋氏文相女清州韓氏 贈參判鏞女俱無子子兄  
子德謙一女適朴亮采任氏出也德謙男命佑女李

著祿命佑二男琨琬女沈一賢內外曾玄摠若干人  
公幼而卓犖雖顯而有勢者與之角不少懾遂痛刮  
磨習氣日孳孳劬業弱冠就九齋宋先生學與南溪  
朴公世采厚齋金公幹直齋李公箕洪講磨道義然  
落落有奇氣不喜爲拘儒曲士獨慕古人瑰意琦行  
常自激昂殆欲執鞭而隨之痛念京周如不欲生每  
酒酣耳熱悲歌灑淚曰海東千里曾無一人義士爲  
復讎雪耻事乎著夢遊記以見志常不廢舉斲以建  
功立名 肅宗己巳 仁顯后遜位公倡多士治疏  
伏闕下時陽谷吳忠貞公斗寅定齋朴文烈公泰輔

諫而死又有 命敢諫者論以逆律中外震怖諸生  
多散亡公與若而人抗疏格于喉院尾斥喉院壅蔽  
又見格遂爲文通告館學及五部坊曲約相率守闕  
會哭公以疏首待罪三日被 嚴旨歸田里甲戌  
上大悔悟復 中宮位除公繕工監監役未幾以代  
製李顯命疏配珍島蓋公與寒圃齋李公爲切友而  
嘗論南九萬爲希載私人可知其秉義之嚴也越二  
年蒙 睿拜平市署奉事疏陳時弊及守城方畧優  
批嘉獎陞漢城府叅軍爲正言李明俊劾罷遂全家  
入壽春山中卜築大明灘上仍自號明灘堂揭 大

明日月尊周義理八字著大明堂記以自敘又以敬  
直內義方外國恥雪君恩報十二字涅于背常焚香  
默坐如對神明或撫劍叱咤悲不自勝人莫測其何  
意也愛史吞巖瀑構亭以處刻臥龍巖於石蓋願學  
孔明也三淵金先生屢造其所甚有襟契云 英宗  
丙午以大耄除僉中樞兼曹司五衛將應 召赴闕  
命乘轎行 異數也時值朝叅公奏七條曰懋聖學  
曰破朋黨曰蠲民役曰禁奢華曰儲戎器曰修城池  
曰察時變每陳一事 天顏溫粹莞爾而笑曰昔年  
聖教許以憂愛其復之 寵諭鄭重承旨以煩猥請

推考公厲聲曰臣雖微末乃陳所懷而遽爾請劾此  
正壅蔽之佞臣朱雲借劔之請良以此也滿廷皆吐  
舌 上大笑稱矍鑠溫諭而慰解之丁未十二月特  
上章陳不虞之戒疏入畱中翌年春逆賊李麟佐等  
舉兵叛公聞變奔問又上本陳捍禦策及招慰亂民  
之方再呈不克徹後 上問成某見在何地筵臣對  
以己沒蓋沮諱也丙辰因相臣 筵奏特陞同知中  
樞府事是爲公出處大略也公形軀短少目光燁如  
精彩動人氣岸堂堂烟火屢絕而不見其憂忠孝根  
天方喪盡禮通於百家技藝如握奇周髀靡不嫻熟

於墨妙尤工嘗以題額被 明陵獎詔詞翰如流操  
觚立就有遺稿藏于家嗚呼公之經綸足以利用而  
厚生公之志節足以格天而感神若其坎止流行之  
與時消息者又足以不失其正豈餘人之所可及哉  
公其有聞於趙重峯先生之風者歟副學金公近淳  
誌公墓曰篤一生尊周之義而天下知有帝矣抗三  
日守關之哭而海東免無母矣至若炳幾陳章先戊  
申而知戊申則著龜之神又何加焉君子以爲知言  
純廟甲戌一路襟紳誦公名義配享公于谷雲祠方  
公之上疏訟 母后也吾先祖兄弟實與公聯名余

以是服公風節不已今公後孫致龜謁公牲石之文  
余雖老閣鉛槧敢憚爲公役乎遂力疾而爲之銘曰  
東方一士曰有成公儻英偉間氣攸鍾歛時跡弛  
自就陶鎔不肯屈首暖妹之風懷奇抱朴自葆性真  
秘用象數博取史文研精韜韜抽心藝園是公餘事  
能自屈伸先憂後樂志在壽民先立其大抱我春秋  
涅背銘心用尊京周運值陽九 坤極將傾守 闕  
號泣聲徹蒼靈備豫防患忠言颺廷何以前知寔由  
至誠矢心復雪爲 皇明臣沒身靖獻爲有母人不  
撓不逃志欲盡倫潛見猶龍子房長源是亦時中詎

涉怪神聲氣相感于華陽翁雖則自樹由師友功有  
屹圓阜四尺其封青霞奇意鬱結在中秋栢不死俊  
骨留馨我發潛光用昭玄扃百世尚傳明灘先生

贈吏曹叅議李公墓碣銘 并序 ○甲辰

景廟甲辰 英廟新卽位時羣兇尚執國勺充斥朝  
著自知其罪難追且忌 上英明相與疑懼而猶動  
稱 先王脅持 英廟 上務涵育恢容會因冬雷  
求言布衣李公義淵應旨言 大行大王以大聖之  
姿不幸有倦勤之疾策我 殿下於儲位以定邦國  
之大本攝贊庶務此誠唐虞之盛事而惟彼羣小闖

隙逞兇以半夜蒼黃陰移天位等說動撓民心而北  
闕潛入竟售其計壅蔽 宸聰釀成奇禍喬木世家  
誅戮無餘至發禁庭喋血之言其心計之陰兇慘毒  
有不忍言者在 殿下之責莫先於亟正羣小掩蔽  
濁亂之罪以明辛丑以後事皆非我 先大玉本意  
且正羣小陰兇慘毒之罪以明春秋必討之義而  
臨御數月一向泄泄神人之憤以是不洩天地之氣  
由此不和上帝之警告不亦宐乎元老被誣風雷偃  
禾姦臣亂政霹靂拔樹災異之由自古而然今 殿  
下省已修政惕然改圖正羣小之罪顯 先王之意

明春秋之義洩神人之憤則人心正而天地之心亦  
正人心和而天地之心亦和矣熒惑之移度祥桑之  
枯死豈獨專美於前耶至若斯文之是非 肅廟之  
遺教昭昭而兇徒無憚於黜享尹志述之忠直抱冤  
士林流涕至今而復享之典褒直之舉尙未即行則  
此豈非召災之一端耶疏入不報時兇徒睢盱旁伺  
得公䟽悍然爲角勝計柳鳳輝李光佐李巨源李明  
彥迭進威喝曰此 殿下父兄之讎 上不得已命  
島配諸賊爭益力遂被鞫問而爰辭不少撓諸賊相  
顧曰毒哉斯人鳳輝以委官酷加淫刑竟以十二月

五日卒于囹圄去其生壬申爲三十三歲時金一鏡  
陸虎龍伏誅光佐愠懟無一辭聲討惟持公甚急班  
諸兩賊其禍將及於泉壤而 上獨不許始公之被  
鞠掌令任公徵夏抗疏云李某忠憤所激欲爲 殿  
下一死 聖考培養士氣我 殿下食其報宋相允  
朴趾赫相繼言李某擔却一死敢陳兒童所共誦之  
忠言且言光佐於丙申處分尚云非 先王本意李  
某之律何不先加於光佐也閔文忠鎮遠袖劄曰兇  
徒秘諱 先王疾患設爲禁防以至導 殿下以撲  
殺上書者而其意猶未已其故何也後 上謂文忠

曰李某事初無殺之之意致斃於二次之刑曾所不  
料其以非 先王本意爲斷案者何罪文忠曰 聖  
上既知其冤枉不可不明白處分 上曰予欲救之  
到今思之亦可悲今姑不可輕議前頭當審量下教  
及乙亥辛壬餘欒尹志等謀叛伏誅尹公汲啓曰今  
當天討大行亂賊就戮褒忠獎節宜在急先故儒士  
李某目見亂賊誣辱 聖躬尺疏叫闡辭嚴義正不  
幸忠反爲罪賞變爲誅宜 特贈禮侑示 聖上悔  
過之意 命收用子孫 正宗丁酉筵臣又言李某  
以眇然一書生首倡大義竟死桁楊士林至今悲之



上曰其在扶植風教不可泯沒 特贈司憲府執義  
甲辰八月以 英廟御極之歲拜 璿源殿 教曰  
彝倫以之不墜凶賊以之破膽予於李某疏見之矣  
中丞之贈豈稱於樹立特 贈通政大夫吏曹叅議  
斯爲公屈伸之大畧也公字方叔號有是齋系出  
璿源以 宣陵別子景明君諱忱爲鼻祖至進士  
贈左承旨諱生寅疏斥鄭仁弘名重士林寔公曾祖  
祖諱齊衡執義 贈叅判以孝廉祭社考諱有錫  
贈左承旨娶慶州李氏郡守壽翼女舉公公生稟絕  
異早喪怙恃而文藝夙就書法典雅性度嚴潔居恒

危坐檢束如不及夫婦相敬如賓閨庭穆如也夙輝  
於公夫人趙氏爲切姻以故相識及輝稔惡遂絕之  
曰忠逆大關也及公抗章戒夫人不相通取禍之酷  
忤輝故也夫人咸安人重呂女校理根其曾祖也嚴  
毅敏達有女士風生後公四歲歿後公四十六歲附  
公墓墓在坡州玉石里子坐男觀秀二女適韓九錫  
俞漢復觀秀男道赫筮仕不就宗赫水使女南宮翁  
韓命洪敬洪李昌純妻韓婿出俞甲柱碩柱水使李  
益秀柳輝存李鍾文妻俞婿出道赫繼子元在前縣  
監女適崔挺柱宗赫男元在亨在水使元在男鍾遠

鍾浩女朴遠愚亨在男鍾俊前宣傳官女金炳奎餘  
幼始 景廟有疾無嗣羣凶挾輿援締結宦妾盜竊  
國柄恣意鍛鍊戕殺忠賢謀危 貳極遂成滔天之  
禍及公疏出諸賊之真贖畢露此其必殺公乃己者  
也公生不識君面而痛 聖誣罔極 國命綴旒出  
萬死之力以犯虓虎之勢赴鼎鑊其如歸蹈危亡而  
不顧古人云非死之難處死之難殞節苟合其宏義  
夫豈吝其歿捐軀若得其所烈士不愛其存豈公之  
謂歟昔陳東歐陽澈之死為天下所悲而不過得好  
惡之正而已公則首討凶逆啓悟 淵衷馴致變化

義理大明詎非公一死之力哉均是以韋布死而公  
之死為大是所謂過涉滅頂凶無咎者耶士不忘身  
不為忠者耶不佞自童穉誦公疏未嘗不流涕公會  
孫元在謁公牲石之文氣意相感雖為之執鞭而不  
辭况以托名為榮乎遂奮筆而為之銘銘曰

天地正氣鍾而為人烈烈李公拔類出倫蹠躡其志  
熱血顛闇為 國急難祗知有君凡百有生秉彝維  
均惟公勿喪能自殉身吾秉吾義奚顧利屯虎豹九  
關啄害狴狴劫火崑岡良玉同焚秋霜白日氣薄蒼  
旻桎梏正命是為成仁仁人志士莫或煩冤靡公一

死漢賊莫分默誘 聖衷宗枋以存垂聲汗竹永詔  
千春有屹堂斧玉石之原碧血丹心炳煥玄宅我銘  
其烈用鑄貞珉俾後過者誦義斯真百世知有 元  
陵忠臣

徐汲齋申公墓碣銘 并序○乙巳

過齋金先生講道于貞山時新經家禍人皆掉臂而  
故處士申公諱在應執經請業服事若嚴君先生期  
望綦重見公冲年所述心性情贊而曰別決肩繁可  
占他日成就語子姪曰某非汝輩友可尊敬之每辭  
退贈詩而目送焉又書徐徐汲汲果而確七字以勉

之仍頽其齋曰徐汲及先生易簣公心喪盡禮編定  
刀圭隨錄隨錄卽先生所著而未及修整待公成書  
加接說闡發師旨又述升堂記聞是所云由其模範  
從其趣尚師逸而功倍者歟公字時叔平山之申以  
壯節公諱崇謙爲初祖十四傳而至息簡公諱浩值  
我 太祖受禪擲璽抗節又九傳而有諱屹 贈太  
僕正當昏朝敦倫斥絕逆臣李爾瞻癸亥反正諸賢  
汲引公同事不應遜于安東之九潭是爲公六世祖  
也高祖諱錫曾祖諱思國祖諱矚生員考諱光集亦  
生員號湖隱以孝行經術 贈持平娶德水李氏進

士觀海女舉公生稟聰慧聽人讀書能傳誦居無散  
容坐必端跪五歲受學逐字問義六歲作詠早詩曰  
白雲天中起長者許其有致澤之意十歲就學于從  
祖新齋公曄日記數百行而必窮其指及師過齋激  
昂感奮於六籍理藪靡不鑽研又手寫河洛圖書先  
後天太極人道心圖作屏而潛繹於三省四勿九容  
九思日夕體驗如符訣孝友天植在幼悶慈母善病  
替行井臼之勞及遭艱居瘠如成人墓所稍遠而朔  
望往哭不以寒暑廢及湖隱公廬墓公在家行饋奠  
奠訖必造廬次視餐炊堦三年如一日及湖隱公病

草土閱月沈淹公夜帶視疾禱天祝斗及革嚙指進  
血至大故疏食廬墓毀瘠幾不全士友相告曰某公  
居戚踰制將減性奈斯文何服除遂廢舉專心求道  
訓誨後進考課有法不以病少懈教子姪各因其材  
而以孝悌爲本諄諄警飭疾益篤精神不耗扶坐誦  
東西銘玉山講義不錯一字修改先公遺事昆季宗  
族咸與爲訣別而辭氣整暇如不病時伯氏勸粥公  
噓唏曰一縷未絕敢不承伯氏所命復爲仲季各進  
一匙仍正席而逝卽丙子八月九日也距其生癸巳  
爲四十四歲始葬龍宮柩洞己丑遷于廉松午向之

原配光山金氏郡守斗烈女過齋兄子也生先公一  
年歿先公五年附公墓左公述其行以狀德男錫準  
女適李周命姜處重金錫奎繼配固城李氏生後公  
二十四年六親頌其賢无音公天資近道而孺染庭  
訓趨向自正而篤信師教其所論名理往往多卓識  
妙解有曰繼善成性統言四德形氣上下分以三等  
生之謂性屬氣質五行各一非本然五常人物所同  
謂有欠闕非也虛靈聖凡不異謂有分數未也性與  
理二之則不是心與氣一之則未妥使經生學子瞭  
然若指諸掌尤濶於禮溯自三禮至東儒說靡不會

通而歸極于沙溪九齋兩先生或有出入於成訓者  
爲文以辨之其言可述也居恒取燭亦多可傳而未  
及成書有零藁藏于家公孝義可以範俗詞章可以  
名世學問壹遵正軌而厄於短造罔充志業惜哉然  
夙被長德所推詡性渾宋文敬公云高見博識已不  
是俗儒糟粕過齋先生亦嘗贊公持已事長之道且  
云於經傳義理纔聞名目獨得宗旨鰲村宋文簡公  
與公同師知德最深許其學曰世不常有悼其喪曰  
氣數所局三賢非苟譽人者是可以識公之爲公也  
公族兄故尙書在植氏對不佞盛稱公賢不佞以并

世不相識爲恨公兄子錫範謁公牲石之文未忍以  
癯病辭者托神交於九京也遂爲之銘曰

律律貞山爲時宗儒遠世自臧獨與道俱公在妙齡  
祛衣先樞非直必慎唯諾步趨叩鐘盡聲克紹師模  
踐述傳習不涉言詮舍命衛道爲升堂賢志高行潔  
學粹歸全我發潛光揭章玄阡令各不泐師弟同傳

判中樞

贈右議政權公墓碣銘

并序○乙巳

純祖大王二十四年冬十有二月十六日判中樞府  
事權公以賀正使赴燕卒訃聞 上下教曰辭陞之  
日見其豐鑠今聞中路奄逝豈勝驚惜是亦死於王

事仍

命贈大匡輔國崇祿大夫議政府右議政兼

銜如例錄其孤孫賻庀加等明年舉還 賜祭三月

葬于定山乾芝洞負癸之原從先兆也後二十年公  
庶子正履將揭碣于墓謁辭于直弼直弼曰公位上  
卿法當樹大碑不碑而碣何也曰是遺志也直弼自  
齟齬受知于公非直以世舊之好有不敢以癯病辭  
謹按公諱常慎初諱禩字綱好少號日紅堂晚號西  
漁其先太師諱幸以功受姓食采于安東子孫仍貫  
焉終麗之世名德烜赫入 本朝有文忠公諱近以  
經術文章名聞華夏五傳而至諱肇禮曹叅議生諱

韜主簿遭弟石洲公詩禍遜跡韓山又再傳至諱讓  
執義以恬退 特贈都承旨卽公高祖也曾祖諱懔  
左叅贊 元陵丁未抗章辨忠逆是非退鄉廬不起  
與二兄文貞貞簡兩公并稱爲三賢祖諱導禮曹判  
書克紹先休爲世名卿考諱植有志行早歿新齋洪  
文清公銘其墓以公貴 贈吏曹判書妣 贈貞夫  
人完山李氏正郎廷煌其考也公生而聰穎及長勵  
業未弱冠發解增廣試華聞已藉甚連魁陞庠丙午  
魁進士戊申除 靖陵叅奉遷童蒙教官陞義禁府  
都事司憲府監察辛亥遭內艱又承重服判書公喪

制除除造紙署別提刑曾正郎丙辰拜江東縣監時  
湖右有儒訟 特命換藍浦調停其事縣有朱子川  
公勸譽髦勗晦菴影堂士多興感戊午被辟爲戶曹  
正郎冬拜信川郡守辛酉以司導寺僉正魁增廣文  
科又魁殿試人呼三場壯元例陞通政階拜兵曹叅  
知叅議同副承旨後累拜至左承旨又拜刑曹戶曹  
叅議癸亥以冬至副使赴燕復 命拜大司諫至三  
大司成至四乙丑除驪州牧使因事罷丙寅擢亞卿  
刑戶禮兵工五曹叅判漢城府左尹同知義禁春秋  
經筵副摠管司導提調其踐歷也庚午除京畿監司

旋哭獨子哀瘁求辭不得請卒以視事疏舉三政之弊并陳優民裕財之方而竟未行識者恨之公自罹西河之憾忽忽無榮途意遂盡室歸韓山日與鄉黨宗族觴詠以自娛有除命不就丁丑拜忠清監司本道有公祖曾二世遺愛公遂起膺命蚤夜靡懈大雨坳營橋漂屋廬公捐俸修治後值方割而民免昏墊人比之錢塘白公堤恤隱繕械亦多殊績民勒石頌惠戍寅擢資憲階仍疏辭兼陳崇儒衛道之方已卯遞拜工曹判書旋移兵曹知經筵義禁居銓秉公時論翕然除廣州留守壬午以獻陵享閣監

董勞陞正憲遞拜禮曹判書漢城判尹癸未以大司憲疏救議禮兩儒臣忤旨謫寧邊居三月省還除右叅贊都摠管復歷都憲司憲提舉司譚院社稷署甲申差正使付判中樞渡鴨水至奉天府之高橋堡原隰驅馳感寒疾遂不起距其生己卯爲六十六歲臨終無怛化意時公以庶弟隨行曰是爲吾飯舍者其言果驗亦可異焉公性於孝七歲而孤服喪如成人事祖考盡誠先意承順奉伯姊如母視諸甥如子胤子獨身善病而不弛身教待族戚曲有恩意咸頌其德崇篤友道重然諾喜施與不以窮達貴賤而



貳視焉以故人皆樂從而遊朋樽日適戶屢恒滿然  
或有干以非義者不以親愛而寬假襟度虛曠每宦  
途升沈或見遺華臉而不恤也居家不問產業贏絀  
往往窘逼覓債而亦不顧也文藝夙就藻譽溢世累  
被選泮製 正廟對判書公問公製述多寡仍稱卿  
孫顏貌好匪久當大闡是可以驗公所造而釋褐後  
正廟之世罔克贊皇猷黼黻之盛惜哉詩文汪洋纖  
密各臻其妙爲詞苑諸公所推詡又手抄諸子百家  
編述者盈屋人謂陸家書巢所著西漁集及 國朝  
大學衍義藏于家配 贈貞敬夫人豐山洪氏吏曹

判書樂命女與公生同年歿先公三十三年閨範端  
凝婦道孝順始葬公州棠谷遷附公墓右男敬履進  
士蚤歿女承旨吳致愚繼配貞敬夫人漢陽趙氏興  
源女生後公十七年歿後公十一年莊穆有度贊公  
柩儀附公墓左有一女適郡守洪翰周側室男正履  
進士有一女適李曾愚繼子思喆蔭補敦寧判官亦  
歿無育取族子衡圭爲嗣吳晚善昌善進士金東賓  
妻吳婿出洪祐昌祐昇校理沈熙淳李敦夏李承游  
妻洪婿出公風儀疎秀器宇雋爽無世俗滯懣暖妹  
之態善談論踔厲風發每引物比類往往警絕傾倒

一座雅有禽尚之癖遇一丘一壑之奇理屐冥搜或  
飄然獨往竟日忘返官位隆顯而自視猶韋布短驢  
孱僕往來湖墅浮家泛宅有苔雪之趣或混迹漁釣  
箬蓑爭席人不知爲宰相也直弼每登公草南亭公  
屈巾烏臨會揚挖泓淸之勝風流文采照暎林泉及  
投老公玄石舊亭想像踈襟曠度不可得以復攀然  
若有奕奕精神存乎其間而江湖有餘韻矣銘曰  
健陵在宥大猷時升用文造士賁飾麗弘公被陶鑄  
克闡賢能三場壯元爲世艷稱實以副華 華哀寔  
承歷試中外功用旣與漢山增重錦水揚清底績夏

官正我權衡衆趨之途獨自喚醒風月襟懷江湖性  
靈發之聲詩玉佩鏗鏘當事不讓再涉殊方遼野冰  
雪用致傷生爲國一死是公素情本之則存世篤忠  
貞捨孝爲忠用振家聲非直家聲尤爲世程煌煌芝  
林有屹其岡凌霞奇氣戢于玄堂我述徽蹟用揭石  
章維後之徵維德之光

大司諫金公墓碣銘 并序○丁未

純廟踐阼之三年重卜李秉樸爲元輔臺臣延安金  
公方食投筮曰官以諫名使是人居是位而可無一  
言乎立草疏屢千言歷數其平生斥之以沒廉恥之

鄱夫喪名義之檢人直聲震朝野時 貞純王后垂  
簾命流公于南海 上荐降嚴教三司相繼論赦并  
不省在島守靜劾書曰此真塵世少歇泊處君子曰  
古之遺直朝廷有人矣公諱鐔字秀民延安氏胄于  
高麗四門博士暹漢至蘿菴山人諱濤入 皇朝中  
洪武制科在 本朝判書文靖公諱自知領議政忠  
貞公諱諡最顯三傳至延興府院君懿愍公諱梯男  
濯昏朝酷禍卽公七代祖也漢城右尹諱滌 贈司  
僕寺正諱相伯工曹正郎 贈吏曹叅議諱炯通德  
郎諱載奕是爲公高曾祖禰也通德公娶坡平尹氏

通德郎峯女諫臣光天其祖也公生稟絕異纔就學  
詞藝日就自弱冠聲譽藉甚連發大小解戊午中進  
士又魁秋到記 賜第直赴庚申庭試 正廟臨軒  
宣醞命舉額而稱俊秀喜甚得人卽隸槐院選講製  
抄啓文臣每登 筵輒被 恩褒 純廟辛酉薦拜  
承政院注書壬戌陞六品癸亥由成均館典籍拜司  
憲府持平兼實錄記注官公性剛不惡而嚴院隸無  
敢橫見權幸臣不待承史而私覲引古義詰之其人  
嗾前事枳公翰薦不踰歲其人果敗公自在韋布素  
嫉李秉模謂是索性小人初入言地聲罪痛快投竄

南荒而有九死靡悔底意乙丑蒙 宥己巳拜副修  
撰兼禁衛營從事官始公之在謫徐相龍輔被人構  
捏亦去國 上敦勉秉模曰有徐判府所遭始覺卿  
事爲嘗試之先也至是公疏辨辭頗峻切時秉模已  
死其子魯益投疏訟其父以公癸亥疏歸之於受人  
風旨公謂彼說挾私誑詬無容多辨對舉其疏陳不  
欲較挈之意 批云猶賢乎遂非又有窮屈自服之  
教適因禁營事坐罷庚午掌試湖南左道辛未以副  
校理疏辨前疏餘意曰臣之再昨夏所遭彼以無不  
是底至情挾必欲殺之私憾語出噴薄全不裁擇然

皮裏春秋人皆有之一段真是非自有泯滅他不得  
故臣不欲提起舊說論人先故只陳人言之不足多  
辨以明臣情之自反無作承 批若曰遂非又曰窮  
屈夫非者不是屈者不直不直不是將安所藉手事  
君乎仍陳湖南民事請釐正軍額俾免族里之徵魯  
益復投疏構捏至以註脚 聖教謂大不敬 命公  
竄軍威數月 賜環壬申敘拜校理出爲北評事例  
兼監市御史號令嚴明市場竦戢選士居接作成髦  
譽癸酉移副修撰疏陳北關事左十數條皆救時急  
務而未盡見施識者恨之又掌試于湖左歸拜德川

郡守不赴甲戌拜弼善殫誠啓沃甚得 翼廟睿眷  
陞執義司僕寺正差書狀官未及赴叙 陵享執事  
勞陞通政階拜敦寧府都正乙亥叅知兵曹除安東  
府使字小民抑豪猾恩威并濟一境大治丁丑賦歸  
漳州江榭逍遙花竹混跡漁釣人不知爲舊學士除  
同副承旨自是屢入銀臺至右承旨或就或不就戊  
寅除工曹叅議庚寅以承旨陳 講筵無實之患請  
先下操存工夫體驗力行焉辛巳拜大司諫辭疏陳  
情仍請禁飭守令在京留連者 健陵遷奉爲分兵  
曹叅知強病供劇或勸其辭公謝曰受 恩罔極復

瞻 玄和盡瘁終事願也敢辭以病乎時沴氣大熾  
疾革而不許醫診曰定命也久於世何樂八月二十  
日捐世距其生乙酉九月四日爲五十七歲上下莫  
不悼盡爲其負盛望而罔究厥施也葬于交河縣內  
面子坐翌年三月八日改窆于其上數武地亦子坐  
公凡三娶元配全州李氏通德郎東直女判書箕翊  
其高祖也閩範咸備寔多內助生與公同年歿先公  
二十五年始葬高陽文峯樓附公墓右別有誌男博  
淵女適承旨李在鶴進士趙基淳博淵繼子應秀庶  
女李麟求李在鶴子教鉉敬鉉叙鉉敏鉉女鄭喜朝

趙基淳子秉球秉璋秉琬秉璿女金禧鉉李昇老繼配全義李氏碩培女清江濟臣後亦有嬪德生後公十五年歿先公二十一年附葬文峯先舅兆次公嘗誌墓三配慶州鄭氏叅奉赫新女雞林君孝常後生子女并歿庶女適李羲幹餘不悉記公天資英特風度凝重挺挺有氣槩遇事果敢如水臨萬仞無復凝滯望之若不可犯而及樽俎披襟風流弘長藹然可見也孝友天植事親順志蚤喪所恃終身含恤鞠於繼妣李夫人嘗往外家姨母戲云繼母亦母乎公大哭絕不復往曰姨母蔑倫不欲見其至誠自髻鬣已

然繼妣抱貞疾公夜帶八年爲文禱名山願以身代愛一弟篤摯而有過則撻之出涕及早歿亟樹墓石撫恤其孤女無間己出居親喪情文俱至盛暑猶不脫衰絰晨謁家廟至病瘳不替值異宮先忌雖遠必叅遇宗族雖疎必盡情治家有度務尚儉約與人交不以死生榮枯而有渝然見諂諛回互者不直視處江湖五年有爲不善者輒問某令公知否如洛人之於司馬端明臨政處事誠力俱到巨細得宜薄試外服信順孚休安東人將迎新倅輒禱云願得仁且廉如金使君者主試秉公關節不得售有怒而欲絕者

公曰親知可絕不可違素志負 聖簡忠愛根天事  
健陵僅數月而每年 諱辰齋居餐素出篋中 賜  
扇摩挲垂涕以言見絀晚雖出入三司不復與朝廷  
議然聞有闕失憂形于色或至痛哭而不知止始入  
春坊 翼廟對宮僚淵默公至誠導達終至酬酢如  
響問難相續時又 頒示磨墨羣僚動色不佞以宮  
僚隨公侍講每歎公滿腔熱血可以孚格 君心也  
文章富健操筆立就辭理俱臻多可誦有遺稿藏于  
家嗚呼公有範俗之行需世之才華國之文而因斥  
時相被其齟齬半生坎壈而不少貶以求合於世且

局於年壽位不稱德惜哉然論人當觀大節公獨立  
敢言如楊椒山鄒南皋之於 皇朝志氣激昂有可  
以廉頑立懦是所云先立其大小者不能奪也昔吾  
先師近齋朴先生被秉模舉剡引義自靖公所樹立  
殊塗而同歸此不佞所以至心慕悅也昔賢論士曰  
氣量品藻品藻所在不風岸而峻不表襮而著不名  
位而重不耆艾而尊天地之美器造化之所靳閱千  
萬人未易一二見嗚呼公非其人歟嘗教子以義方  
曰驚乎外者必遺乎內其得失不難知博淵甫欲赴  
庠試請於公曰教授知兒名意可以取中公正色曰

汝年尚少已欲窺主司意以圖進取幾何不敗壞心術命勿更赴陞庠博淵甫服誨唯勤種學績文砥行立名亦可謂能子也博淵甫以不佞於公氣意相感貫徹幽明屬牲石之文而恨無如椽巨筆模寫其張秋霜氣也公嘗自號澗松觀松是公耶公是松耶後必有辨者銘曰

有美金公間世豪英磊磊落落皎皎亭亭策名揚庭受知 聖明如弦斯直若冰斯清鋤彼幽姦丕振風聲在宋唐介在唐陽城不撓不逃不恤死生再竄南荒志節彌貞卓立蹈厲由所性行扶植名義用裨世

程本之則存孝友天成施於有政爲世儀刑誰之不若而不公卿飛不盡翰致詰冥冥疇無七尺疇及百齡疇如我公全身完名于以揭美河上之瑩我無愧辭質諸蒼靈

軍資監正吳公墓碣銘

并序○戊申

文靖公醇菴吳公惇德邃學模楷矜紳有兩胤寧齋處士諱允常抱道守約潛光早世老洲文元公諱熙常克紹真傳爲世儒宗文元公配安東權氏牧使贈贊成濟應女生子諱致成初諱致奎字瑞五過房爲寧齋公嗣子尸文靖公祀妣光山金氏下從 旌



閻其考縣令相聖也公籍海州胄于軍器監諱仁  
裕累傳至貞武公諱定邦著節昏朝忠貞公諱斗寅  
諫死於黃巴之變寔公五代祖也高祖諱泰周海昌  
尉諡文孝曾祖諱瑗工曹叅判 贈左贊成諡文穆  
文穆公長子諱載純判中樞兩世繼典文衡卽文靖  
公也文穆公季子諱載紹判敦寧定獻公取文元公  
爲嗣 侍講院贊善 贈吏曹判書公胚胎前光生  
稟異質罕言語不喜遊戲稍長自力爲學兼治功令  
庚午中司馬癸酉筮仕童蒙教官掌苑署別提司憲  
府監察刑曹佐郎 景慕宮令翊衛司司禦衛率軍

資監正永平縣令天安郡守南原府使尙州牧使其  
內外踐歷也永平饒名勝公餘乘輿成吏隱之趣天  
安時坐失兼邑符配牙山縣文元公勉以處埃讀書  
携鄰經誦繹不輟文元公喜曰是玉成汝也以宮僚  
出爲南原值 翼廟代理 賜對面諭異數也後牧  
尚州歲旱民饑襁負相屬亟捐廩以濟至春設賑辨  
民里別男女序長幼而施饋有條理病者療之以藥  
擘畫周至竟無捐瘠邑有舊逋鉅萬掩而不理乃剔  
簿而分徵吏民無相侵越籍死亡官出錢充完以千  
計積弊始舉邑以再造爲政信順休洽鉤距不施而

施措必熟量以果行故久而無廢民懷遺愛壬辰丁  
內艱去官癸巳文元公又捐世痛慕終身絕意進取  
薦拜監正辭遞甲辰十一月十日享年六十而卒乙  
巳正月葬于陽城盤谷里丙午遷于稷山文靖公墓  
傍乙坐配青松沈氏縣監能秀女有女士風生先公  
三年歿先公三十二年始窆于稷山先兆至是遷附  
公墓舉一男一女男弘善生員歿取族子俊泳爲嗣  
女適李鍾愚系子喬翼繼配潘南朴氏宗珏女也公  
天分甚高恬靜寡欲事親承順無違未嘗有過八歲  
侍文靖公疾夜帶不寐而亦不告憊及承重服喪衰

麻受弔哀感如成人事文元公有至愛郊墅江第未  
嘗一日離其側也文元公邵齡寢疾酬接文字替勞  
者居多在南邑間慈濟奔走不及臯復齋恨沒世如  
不欲生荐罹外艱哀毀幾不全收拾先稿竟成全部  
常以未逮事寧齋公爲至慟哀輯遺事挽誄參以家  
庭舊聞續成家乘用寓追慕與季氏篤摯聯榻共處  
五十年殆不知爲二身視從弟如同胞恤其兩孤如  
己子祭祀昏嫁極力扶助俾盡情禮推及疎屬曲有  
恩意至者如歸家典邑餘俸不以自私視親意所欲  
施及窮乏而不少吝自奉以約而訊遺不及朝貴世

服其廉貞居恒沉默對人不爲貌悅而中肩洞豁惟  
恐人之不獲於我也性度寬厚而至陰陽淑慝之辨  
確乎不可奪尤誠機變勢利不啻疾如也務自遵  
晦不事徵逐惟對案潛繹目不移瞬左右圖籍凝塵  
滿榻而形神超越過戶者不知室中有人至若服食  
有定規居止有恒處不少變易雅言士大夫出處去  
就有關世道不可苟也少時辭庭試南省之期值親  
忌日決意不赴或勸云忌日罷齊無拘公曰古者忌  
日相吊何謂罷齊其人愧伏晚哭胤子曰屢世氣脉  
絕矣自是塞兌息影以自終焉蓋公世以節義孝友

道學文章相禪遂爲名胄公又酷肖文靖公外若無  
所矜式而內實積累融貫由由自樂於得喪寵辱脫  
然無累者克遵其遺篋士之遊文元公之門者樂與  
之交曰先生之肖子先執長德皆折輩行投契獎誦  
曰法家後承當推第一不佞每拜函丈退見公輒縱  
論古今人物學術詞章以及進退行藏賢邪瑜類之  
分而權度不差非出於聞見之知爲文靡所蹈襲而  
繩尺自嚴嘗謂文人伎倆不切於理汗漫害道以此  
不事著述亦毀稿嘗取往昔以我觀書之語名居  
室曰我觀可驗其專於內修也雅不以學問自名而

名實純粹超然若遺世獨立物莫與競古所謂不可  
得以貴賤親疎者公實有焉於乎懿哉公弟致翼穉  
輔命不佞以麗牲之文未暮而穉輔又歿矣不佞嘗  
述文元公狀德及胤君隧誌又題公墓石老而不死  
哭公三世悲哉和淚而爲銘銘曰

究三才之理而不以學問自居讀五車之書而耻以  
文藝自娛續七世文獻之傳而不違如愚抱九需利  
用之才而斂寂若無居家採南陔之蘭而孝自天植  
莅官載鬱林之石而清畏人知將何用不周何施不  
利而退然若不能爲如渾金璞玉之自韞玄酒大羹

之無味安時處順與物無私所以歿身逃名而名在  
其中斯其間黃叔度徐孺子之風乎

贈副提學桃園俞公墓碣銘 并序○己酉

國朝 靖陵之世羣賢彙征大猷時升值奸兇蔑貞  
斬伐蕩殘世道交喪桃園俞公炯時爲正言與持平  
尹漑抗章救靜菴趙文正公遂罹文網擯斥累年遜  
于加平之朝宗若將終身中甲黨禁少弛公叙拜銓  
郎而時事危疑不安於朝乞養老母得邑清風乙酉  
六月三日卒于官距其生 成宗壬寅爲四十四歲  
附葬于坡州坡平面新谷先兆之甲坐用遺命也

宣廟戊辰 贈公弘文館典翰 英廟丙寅追獎已  
卯名臣相臣宋寅明奏曰故正郎俞炯卽 中廟朝  
名臣趙光祖金淨之黨忠君愛國之心已著于東史  
則尙闕褒揚實爲 聖世欠典請加 贈 命贈副  
提學兼銜如例斯爲公始終大略也公字明仲桃園  
其號也昌原氏以高麗寶文閣直提學諱涉爲遠祖  
再傳至諱弘以司宰令值王氏屋社棄官入麟蹄月  
落山中畢生隱淪子諱貴生仕 本朝爲工曹典書  
是爲公高祖也曾祖諱尙智集賢殿直提學祖諱造  
司諫院司諫叅佐理原從勳考諱世健 贈左承旨

用公推 恩也妣順天金氏司藝仲孫女公配洪州  
李氏司諫慶從其考也附公墓異壙公丁卯中進士  
甲戌與朴公世熹同登文科翰林三司吏曹正郎忠  
清都事淮陽府使楊州牧使清風郡守卽內外踐歷  
也公與靜庵諸賢同其進退其德義風節固多可述  
而世代寢邈文獻無徵只有公出宰時儕僚贖章黃  
冢宰孝獻詩序曰某爲清風守朋儕咸歎惜曰材宜  
玉堂而棄僻邑於計則得矣所失非一端冷川朴文  
康公詩曰君侯自是第一流端操不與凡人同人稱  
玉堂天上卽謂宐黼黻朝王宮少冢宰尹公安仁詩

曰薇院讜議會推直銓部論材早得平訥齋朴文簡  
公諫辭曰明星愈爛旭日最光惟茲二物俱出東方  
誰非東人君厚受哉落翰成字銀鉤鐵索吐詞爲章  
蘭根柳骨其聲望之取重當世者類此古人云不見  
其人視其友是可以知公之爲人也公有三子必崇  
縣監必成叅奉必忠副奉事有三孫沆叅奉濬監正  
澄僉樞曾孫三人應恪將仕郎應愷直長應恂生員  
子孫繼聲克趾先美往往被薦剡登顯仕可驗公身  
教所推也銘曰

矯矯俞公已卯名臣步趨靜庵同其屈伸苟克志業  
靡遠不臻雖則短造完名全身曠世興感再遇 渙  
息榮光上燭天日融晶于德爾劬于家爾羸匪家則  
羸惟後之成律嶺坡山鬱鬱佳城滄桑陵谷不朽斯  
銘

僉樞崔公墓碣銘 并序

國朝龍蛇之禍嶠南首嬰獠鋒死義之士亦相繼而  
作用基 宗社匡恢之業焉時泗川崔公斗南没于  
倭寇不屈而還亦可異焉始倭奴猖獗魚肉一路而  
泗爲其要衝邑宰鄭公得悅死之民皆爲歟竄動被  
殺掠公奉父叅奉公逃難于林藪備閱艱險躬採拾

當甘旨雖予漸劔炊而怡怡如也若是者數歲每遇盜輒涕泣求哀言有老父盜感其誠不忍劫畧或戒備他盜一日少出爲倭賊所襲將加害渠酋審視曰斯人顏貌殊絕必多子孫將擄往其國械鐵索以守之公用計自緩伺其醉睡奪倭酋劔踰城行數里倭奴數十輩追及公度不能免翻身向賊手刃其前者餘皆逃散公歸尋叅奉公所叅奉公自失公絕粒已屢日見公而甦時公年十五公以孝行純篤及聞於朝蒙給復之典而識者猶恨其未食報也公字樞之系出朔寧以高麗平章事諱天老爲鼻祖有諱卜麟

始仕 本朝爲大司諫生諱道源舉遺逸拜持平曾祖諱傳忠順衛祖諱發考諱振寧皆叅奉妣晉陽姜氏義賢女以萬曆辛巳舉公于泗上之豐井里用壽職拜通政僉樞配晉州鄭氏節度使啓賢女附公窆于縣南鞍岾山坐艮之原育六男曰元立亨立貞立克立峻立德立曾孫以下累百人公童年被擄能不辱身冒危忠養至行著聞爲宗黨艷服致 朝家表獎可驗其所自欽而雲仍蕃昌殆不勝數天之報施其在斯歟世遠文喪事多闕佚然彌畧而彌可信亦何以多爲哉公七代孫濟默秉默從我遊因謁公墓

銘辭不獲已援筆而書之者以公之陷虜不污養親  
盡誠其所以有裨世教無讓於死義云爾銘曰  
遇難俱全卽古江革潔身遠害用盡子職惜其生晚  
不載小學述紫陽義庸闡微躡于以勸孝永詔南服

承文院校理金公墓碣銘

并序○辛亥

咸從府東二十里烏山下枕卯之原卽承文院校理  
金公諱鼎衣履之藏也公字凝之初祖諱大猷高麗  
侍中封清風府院君子孫仍翼焉入 本朝有諱勵  
翰林安東府使寔公五代祖也高祖諱支東文科蔚  
珍縣監始卜居于咸從安國洞曾祖諱興敏効力副

尉祖諱義遵修義副尉考諱宗砥務功郎務功公娶  
竹山宋氏緞之女舉公公聰慧絕人文藝夙就九歲  
作治工詩十一歲戲作獵夫輓人皆傳誦稱奇童  
嘉靖壬午中進士甲申擢文科歷官全羅都事谷山  
府使承文院校理未忍離違投簪而歸養志物俱備  
洛中舊僚以書勸起則答云牟酒一杯不換三公親  
沒不復進取以詩酒自娛作戒酒詩曰醒時却悔醉  
時情醉後還忘醒後盟若使醒心持醉後此身何事  
困人評其所托物吟詠皆類此原配瑞典金氏孝源  
之女繼配海州吳氏起亨之女前後配并附公墓叅



奉世淵原配出宣務郎泰浩進士金德祐牧使金台  
佐妻繼配出世淵男德潤崇仁殿叅奉泰浩男觀海  
禮賓副正觀水崇仁殿叅奉觀浚觀澤德潤男周南  
通政國南觀海男鉞觀水男鎔德川訓導觀浚男興  
龍僉正振龍成龍海龍周南男熊祥麟祥龜祥  
龍祥國南男鸞祥訓練主簿內外雲仍累千人天道  
報施其在斯歟公後孫正洙諱文于不佞噫以公雋  
才必當有爲於斯世而永辭簪笏用自存身時經已  
卯士禍士皆遵晦遠害公爲養親謝事遯世不悔是  
謂明者默足以容者歟不佞耄荒不能修辭而竊感

正洙苦誠力疾而爲銘銘曰

吁嗟金公砥行立名時值陽九用晦而明風流弘長  
鷗詠於晦報在不食于後遺羸鬱鬱曷岡恤恤玄扃  
凡百西士視我揭銘

梅山先生文集卷之三十五

梅山先生文集卷之三十六

墓碣銘

司饗院副正遯軒李公墓謁銘

并序○己酉

莊光之際多秉義自靖之士如金東峯南秋江是已  
又有遯軒李公諱緝妙年大闡 文宗朝特拜司饗  
院副正太學訓導逮 端廟遜位與其再從祖胡屏  
公念義借隱仁王山下號中和堂舍真葆彩用自遵  
晦及聞 端廟昇遐痛哭終日挈家眷遐舉于鳳山  
岳嶺山中改號曰遯軒此其志也雅言必稱忠孝或  
有問字者必手寫忠孝二字循循教誨風俗勁悍不

知四維觀感于公民風丕變指所居曰訓導洞并時  
諸賢金佔畢金珮厓姜晉山同謫偕唱號公以白雲  
洞主入風流儒雅至今流傳傑句偉篇可備 熙朝  
大雅之選然在公爲餘事公所樹立卓異高風峻節  
是亦金南之流亞也公系出慶州麗朝刑部尚書贈  
司空諱周佐以勳績封牙州伯子孫仍貫于牙山入  
我 朝有諱邕以前朝大臣甄拔爲左議政累徵不  
就屏居牙山與牧治兩賢嘯唳漁釣人稱以釣隱會  
祖諱節進士祖諱雲生縣監考諱達孫及第妣金海  
金氏郡守濂女舉公于 英陵甲寅卒于 宣陵十

三年壬寅十月十五日享年四十九墓于岳嶺壬坐  
配全州李氏潛其考也生先公四年歿後公三十四  
年墓在楊州天寶山東麓子坐以 國陵火巢失傳  
有四男啓英迪順副尉啓芳啓棠啓郁啓英四男元  
宗通德郎元臣元隣元弼通政 贈戶叅元弼五男  
曰琦曰璉廣興奉事曰璘壬辰死於節 贈兵曹叅  
判曰珪以孝薦 除齊陵叅奉曰琮武科宣威功臣  
璘男先發又死於丁卯胡亂琮男先仁武科振威功  
臣公後孫時彩謁銘于不佞癘病垂死倚閣筆硯久  
矣每誦公詩有云木因直伐不嫌直蘭以香燒尚守

香人有時難如改節比諸物理亦何當是爲言志也  
充其志可與六臣同歸而公旣沉淪而自晦人亦莫  
克闡揚姦節懿蹟闕而不章惜哉然公之畢義守身  
天理當然吾不得不然者何有於後世之名哉余平  
生樂道人之善而服公之烈無所爲而爲爲之銘曰  
嶺嶽岳嶺鎮茲西垠邈世長往曰有其人其人維何  
莊陵忠臣不易乃心靖獻其身苟充其操夷齊之倫  
無所爲爲厥德乃真大化爲徒名蹟俱湮我旌厥墓  
昭揭千春課忠責孝用警衿紳

東溪崔公墓碣銘

并序○己酉

湖南古稱多氣節之士有再舉義旅竟死於忠者東  
溪崔公應立是己公字柱極性於孝儻慷慨好善  
嫉惡有食牛氣好武藝人擬諸干城之材當 天啓  
甲子賊臣李适舉兵叛 國步南遷公聞變號泣誓  
不與賊俱生倡募鄉兵恐未見孚於徒衆率家僮及  
募兵三百人赴白公咸生軍并力勤 王及鞞峴之  
戰賈勇先登短兵相接斬獲甚多發謀出奇一軍賴  
而增氣遂得報捷 朝家嘉其忠勇遂褒銖振武原  
從勳退居泰仁之東溪常習韎韐思殉 國家之急  
及 崇禎丙子建虜東搶襲京城 大駕幸南漢

下哀詔徵四方兵入援公又與白公召募數千人修器械裒芻糧仗劔行師軍伍整肅士氣益銳白公爲先鋒公爲後殿及到江都城已陷直馳入賊陣接戰公中丸裹瘡手格氣不少挫矢盡力竭遂與白公同時立懂丁丑二月某日也距其生已亥爲三十九歲葬于本縣東村面大谷良坐追配于慕忠祠公系出朔寧領議政寧城府院君諱恒左贊成諱永瀨吏曹判書諱秀彥三世繼顯累傳至諱鑽成均生員諱罕國通政卽公祖禰也妣礪山宋氏主簿勉植其考也公配密陽朴氏明湜女附公墓有九子延壽慶壽耆

壽占壽丙壽卞壽善壽九壽士壽孫曾甚衆亦多科名不盡記噫公以遐鄉下士生不識君面而徒以忠義相感激取捨熊魚拚得頭顱惟知死於君父之爲惡赴白刃如驚其風節卓越可暴於天下後世於乎休哉當時死義者雖賤如李士龍姜孝元咸蒙尤庵宋先生表章而獨公名不見抑事蹟寢晦無能以告者歟若公死綏之忠卽天理所當然名湮滅而不稱於我何有哉公六世孫源抱狀謁銘其誠懇篤竊附宋先生發潛闡幽之義力疾而爲銘銘曰嗟嗟崔公挺生南國一死報君素所蓄積荐興義旅

忠出其性臨難忘身見危授命無所爲爲是乃成仁  
苟求得正勢與擬倫血血幽堂嶺嶽大麓丹心碧血  
不磨不泐我歌大招用旌牲石風烈振世永垂無極

聽澗堂李公墓碣銘 并序○己酉

夢窩金忠獻公被建 儲禍遜于南荒受 後命于  
星州時唐焰燔穹人莫敢嚮邇李公諱志完冒危難  
臨吊哀傷如親懿有勸止者公笑曰死生有命何用  
怵爲躬自庀喪備盡儀文發奴僮丁運轉至開寧閣  
寧倅督軍校塞路伐喪公挺身擗殿得以踰嶺嶺中  
異類眈眈視公至削名儒案罰目云弔逆屍護逆喪

三手餘孽四兇遺醜公夷然自况以暮年光華貞庵  
閱文簡公贊之曰乃兄脫屣郎官乃弟自投禍網李  
氏一門何其義也蓋公從兄志尹以金吾郎當北亭  
尹公志述獄不仕自請被禁錮三從兄志達爲文祭  
尹公有求仁得仁語被遠竄故云始公嗣守祖考遐  
躅居星州之仙鈴山下同井多異趣者舍舊而從之  
公懼其混善利而失趣向創尤菴先生影堂於老江  
倡髦士肄業及辛壬禍作眞幘幾不免腰膺之患公  
捨命衛護卒得無事以喬木世裔不忍見忠賢駢首  
宗社將亡忽忽欲無生時丹巖閱文忠公居謫是邑

公與論忠逆邪正失聲流涕及乙巳丹巖薦公拜繕  
工監役公以 英宗初元義理大伸黽勉膺 命歷  
義禁府都事司憲府監察 永禧殿令丁未出監和  
順縣律身清簡益民慈惠戊申亂起湖嶺懷章握符  
者望風逃竄公兼管四邑繕戎聚軍諭以親上死長  
之義威望攸暨兵民亦樂爲用馳書遠近激以忠勇  
公從姪世琬時宰知禮立斬陝川賊傳檄者人謂得  
公孺染之力云亂已竭心勞來俾之安堵不聞孺化  
賁然可觀道臣舉公治行請借陞秩及賦歸或云棄  
廩餘無義公曰欲以此累我耶罄橐而歸縣人勒金

石頌惠山僧閣以蔭之晚與門生子姪討論經史絕  
口不言世事貞庵嘗命駕浹旬講劇公請名所居室  
閔公遂書聽澗堂三字蓋取考槃之義因以爲號焉  
用優老 恩陞嘉善階家人請設酌獻壽公不許只  
告榮禰廟是爲公行治大略也公字仲全系出碧珍  
碧珍將軍恣言爲始祖世襲圭組入 本朝有左叅  
贊平靖公諱約束兼文武才錄清白享俎豆生諱翰  
林紹元再傳至諱碩明郡守諱敏善縣令寔公高曾  
兩世并著廉謹俱 贈亞卿龍蛇之變聖廟灰燼縣  
令公掌議太學叫 閣重建士論推重祖諱尙逸觀

察使與兩宋先生結道義契爲 寧陵名臣考諱塚  
義禁府都事用公推 恩 贈吏曹叅判叅判公娶  
清州韓氏郡守必大女舉三男公其仲也生稟聰悟  
氣貌秀潔被叅判公鍾愛嘗稱吾家千里駒叅判公  
不勝喪卒公年十二居瘖守制若成人墓隔宿春而  
朔望必展省哭諱如袒括有終身慕嘗恨早孤失學  
及成童自奮曰人不可以不學學不可以不博始從  
兩漢諸家施功不數年淹貫既而曰讀史而不本以  
經如無星之稱將安所準則哉反求四子六經潛心  
體究并治博士業辭極雅典而旋謝功令專以教授

後進爲務謙卑自牧不立標榜因心制行動中禮度  
接人必要感化故處官居家不施箠楚有罪者自戡  
信順休洽鄉隣貴賤咸得其歡心收恤宗族無間親  
疎通有無共飢飽自奉儉約煖帛重味不近於身口  
所居不蔽風雨而若無覩也姻戚之幸近邑者請爲  
之葺屋公辭曰吾老矣一枝鷓棲何可累人尹公陽  
來鄭公益河按嶺節憫公窮篋周以數百斛公曰故  
人情厚不敢不受卽分散親戚隣里其酌辭受而篤  
天倫者如此性好急難有素不識者遺癘死隣店里  
正將編囊掩骼公曰治士喪不可以無禮出歲制澆



衣衣之人以爲難在湖邑李公顯應患癘歿於南平  
任所公聞卽哭臨用庀終事雖婢僕老而有勤者必  
蒞慟其至誠惻怛人無不愛敬以乙亥九月二十五  
日卒去其生戊申爲八十八歲臨終著遺訓勉以持  
身正家睦親戚和鄉黨且以學問功令分賓主條理  
不紊葬于本州孤嶺子坐之原執紼者亘數里過墓  
者式焉配順天朴氏崇煥女忠正公彭年其先祖也  
生先公六年歿先公六十年附葬善山廣坪縣令公  
兆下酉坐繼配忠州朴氏塾女生後公九年歿先公  
九年墓在本州管石里壬坐咸有婦德閭儀无缺一

男世琢出后伯氏繼配无音取再從姪世瓊爲嗣挺  
觀及縣令金敏材宋鳳相妻世琢出也挺謙世瓊出  
挺謙男壽普進士女成最杰進士二男克聲都事克  
聞女牧使申在順都事男教峻孝峻敬峻女宋欽晉  
克聞無子子孝峻女沈肯澤教峻子女俱幼公幼後  
一鄉章甫齊聲發文曰聽澗公當日秉義卽其未受  
命之夢窩異時流芳可爲不就謫之丹巖將以并侑  
于兩賢之祠爲本家所挽其事雖已而亦可驗公議  
之有定也不佞夙服公風節雅言中庸之四強矯鄒  
經之三不能公庶幾有焉公五代孫教峻從余遊述

家狀謁幽堂之銘不佞癘病垂死未敢爲不朽圖而亦不忍辭者卽公樹立使然也遂力疾而爲之銘銘曰  
忠孝丹衷剛方素履一誠攸立百度咸備溫柔之教賢愚受賜善利之辨死生不貳值百六運尋一箇是三賢并門一何好義先立其大餘皆推類身全名完是爲君子原始要終浩然无愧躋九耄壽班貳卿位後承好學克紹先懿天道報善詎不在此公自不朽何用文字我庸作銘永詔南紀

渭原郡守

贈禮曹叅判尹公墓碣銘

并序  
己酉

元陵四年安義賊鄭希亮舉兵叛全嶺震蕩懷章握符之臣舉皆身歿竄無敢設一矢向賊者時則尹公東郊以山陰縣監慷慨奮義曰吾受命百里敢不以身殉國遂移檄興師矢誓號令明肅籌策浚密犒軍登高俯臨屯賊大呼曰脅從者遁否者且盡劉縱擊大破之邑以再造賊平賚功退讓不居祇錄原從勳及回再戊申一方章甫顓公忠節卓異特贈嘉善大夫禮曹叅判兼同知 經筵義禁府事春秋成均館事五衛都摠府副摠管可驗公議之定彌久而彌真也公字命汝系出漆原鼻祖曰始榮新羅

太師至麗季簪組相禪至諱子良八 本朝尹京兆  
封漆堤君諡忠簡累傳至諱大備主簿 贈戶曹參  
判生諱衆 贈司僕寺正生諱斯殷 贈左承旨生  
諱世樞 贈戶曹參判卽公高曾祖禰也妣 贈貞  
夫人驪與閔氏學生倭其考也公生質端秀肌膚如  
玉性於孝居喪廬墓哀毀幾滅性戊子登明經科旋  
遭承重內艱服闋除保安丞陞泮職春曹郎庚子出  
監長淵縣爲政清慎淵人樹石頌其惠丙午拜文兼  
宣傳官冬出宰山陰戊申亂定歸寶城鄉里構亭竹  
林申顏其軒曰此君優游自適以爲終焉計庚戌有

北憂廟堂謂公有禦侮材拜渭原郡守公冒危難赴  
任是歲十二月四日卒于官去其生丙辰爲五十五  
朝野多嗟惜窆于本郡獐項向巳之原從先兆也配  
淑夫人礪山宋氏生員來松女吏曹判書世亨其五  
代祖也閻範甚懿六親稱之生先公二歲歿後公二  
十三歲附公墓左二男鶴齡鳳齡俱通德郎從公子  
亂多勞勩鳳齡過房二女適通德郎朴思益僉樞任  
鏡泰孫陽復陽昇典籍陽暹陽晉鶴齡出朴壻子春  
吉任壻子長源承旨五源學源興源 贈注書浩源  
餘不盡記公居家而孝處官而廉且有志節匹美前

修而值湑灘之變凶徒布列中外謂君可讎謂國可射藩鎮爲其聲援廊廟觀厥成敗宗社之存僅一髮耳公乃能挺身勵氣敵王所愾勦蕩兇賊用著封疆之功激勸忠勇之士是豈無所本而然哉公嘗篤志問學從陶庵李先生遊觀感真而造詣正故見諸行事者乃爾於乎休哉公後孫心鉉弼鉉以心齋宋文敬公之狀謁銘於余余老病垂死倚閣鉛槧久矣獨於公義不可辭以明順逆之分善惡之辨庸告于兩南髦譽銘曰

有美尹公惟孝爲政輔以師友其本則正薄試三符

治尚簡靜值歲戊申變起湖嶺舍順從逆舉懷觀望公自奮義矢心殉國乃整其旅乃馳其檄乃礪鋒鏑乃峙饌糧一舉掃蕩安我封壤一方民物生死存亡推以國恬公與有勳歟却不佞婆娑林樊連雲翠竹猗猗臨軒跡公平生无愧此君嶽嶽章原儼若斧堂聖朝褒贈榮賁石章彤公于辭用替紀常

吏曹判書諡文簡李公墓碣銘

并序○己酉

文正公陶菴李先生盛德大業表準斯文而身教所推用成家範門庭詩禮克紹先休故冢宰小華公諱光文乃其一也公字景博小華其號也系出牛峯以

高麗侍中公靖爲初祖入本 朝珪組蟬嫣至叅議  
贈領議政諱有謙以儒學顯是生右議政忠憲公諱  
翻爲 明陵名臣有子諱晚昌進士 贈吏曹判書  
有孫諱緯左叅贊大提學是爲陶庵先生卽公曾祖  
也祖諱濟遠大司諫 贈吏曹叅判考諱采號華泉  
戶曹叅判 贈吏曹判書用公貴也華泉公文學聲  
望矜式士林妣楊州趙氏吏曹叅判榮順女忠翼公  
泰采其曾祖也孝友貞淑公承藉前光以 正宗二  
年戊戌生生稟絕異無疾遽色纔受史已成誦寫字  
自具體裁既長以外氏罹丹書不應舉或勸赴洋試

而亦不從關門劬書若將終身及外氏幽寃畢伸始  
入試圍辛酉中司馬丙寅魁柑製及放榜 純廟賜  
樂以寵之己巳薦授承政院注書藝文館檢閱因注  
僚汰拿疏引徑出 嚴批還差注書尋還史職冬除  
奎章閣待教例兼弘文校書正字公以叅下各官有  
四而一時遍舉爲難安引華泉公在嶺邑專書爲戒  
再疏辭 不許用牙牌促召公猶逡巡不進 命拿  
勘既罷旋仍館錄日又違 召罷辛未還付檢閱因  
下僚徑陞援例陞六品付別兼春秋自是歷敷清顯  
內閣則檢校待教直閣春坊則兼文學兼弼善兼輔

德 世孫右副賓客臺省則獻納執義大司諫大司  
憲論思則修撰副修撰校理副校理應教副應教副  
提學間拜訓局郎文兼宣傳官西學中學教授議政  
府檢詳成均館司成司僕寺正書狀官甲戌以 御  
製監印敘勞陞通政拜同副承旨屢拜至七十餘度  
又以堂品 特除知申異數也歷拜刑禮戶吏四曹  
叅議大司成庚辰以產室廳藥房副提調陞嘉善拜  
禮刑吏兵工五曹叅判同知春秋 經筵官義禁府  
事都摠府副摠管差備堂旬管湖南己丑 睿旨添  
書擢漢城府判尹尋差進賀使以刑曹判書差 墓

所都監提調又拜工曹判書兼差用 儲都監提調  
差伴送使都摠管知春秋 經筵義禁府事知實錄  
事吏曹判書兩館提學右叅贊知中樞又以 兩朝  
御製印進勞陞正憲提舉承文院惠民署觀象監司  
饗院春川府使全羅監司水原留守茲爲公內外官  
闕也壬申西寇未平公以館職陳疏言日昨 傳教  
可以感豚魚化龍蛇豈止驕將悍卒投戈泣下已矣  
哉然彼反側者尚懷疑懼聚首傾耳考 殿下所行  
之事驗 殿下所宣之言言與事符則遷善之心漸  
固事與言符則思亂之心復興故古人云動人以言

者其感不潑動人以行者其應必速仍請選良吏得  
民心救饑餓禁竊發又曰畿甸四方之本京師畿甸  
之本而強劫椎剽肆行坊曲其憂非細而畿邑饑饉  
尤甚民情倒懸而催科不止乍散還集之民不堪鞭  
扑人心一去不可復收民勢既窮靡所不至竊恐  
國家之憂不在關西而在根本之地克恢通變大施  
拯濟俾草竊奸宄無敢有滋蔓難圖之患又請敕西  
征將臣廣寫 綸音數百本揭旗竿約飛矢遍示城  
中之賊則自應背逆歸順申嚴海防伺察非常預簡  
舟師以絕亂本終言益加兢惕雖在獻馘奏凱之後

無忘羽書旁午之日則太平萬世自今伊始苟或謂  
賊平無憂不念悔禍之實則國之安危未可保首尾  
累百言切中當世之急務 上嘉納甲申以諫長因  
雷異陳勉槩言上下不交在易爲否否則陰陽不和  
災沴屢興仍請輔導 東宮審理冤獄 優批體念  
丙戌以玉署長行館錄丁亥觀察湖南值歲飢捐廩  
營賑民不知災勸農課士不循恒例及秉銓注擬循  
格不被時議所撓 當宁初服以閣臣曾經賓僚輪  
進勸講進講前日披卷端坐心語口釋必盡究蹟無  
疑於心然後始登 筵處通密三十年隨事規諷時

有掖穢犯死罪特貸者公奏曰此輩急於自脫冒犯罔赦必自知其當律之不可違既知其虧損國綱則何爲此屈法乎又有大僚以非罪削黜者而文廟酌獻之命猝下公又奏曰大臣設有可罪之端原情而恕之優禮而待之有光於舍弘廣大之德而乃以適然不審之失遽使之逸出門外氣象愁沮命令雖係於一時瞻聆有關於八方過計之憂不但在於今日且文廟酌獻何等盛舉而深夜發令猝地行禮有違重祀典之義京兆郎有以慢忽被罪者公奏曰知委坊曲招致者民此非常時待令而又就其中抄出

貧窮者則易致遲滯刑章貴乎得中而流三千里編配中重典處分恐涉過當上可其奏命釋之其斷斷忠款言無不盡者如此戊戌春示憊閏四月十八日考終適以所降之甲而月未周矜紳咸稱賢宰相逝矣上遣閣屬官吊孤致侑如禮七月葬于陽智縣西墨街良坐乙巳用勤學好問一德不懈二法賜謚文簡配貞夫人昌原黃氏縣監載鼎女文敏公慎其先祖也舉五男三女壻今府使壻進士出后尸文正公嗣壻并天埒前大司成壻前叅奉女適叅判韓正教洪用周進士金寅根壻女朴顯陽餘并



幼公天資和厚儀度端凝寡言笑謙慎自牧孝友天  
植生極愉婉沒盡著存每朝率諸子謁廟朔望必拜  
宗祠承祭齋潔務殫誠禮哭諱如袒括或遇先公所  
嗜輒泣不忍進用誠先事彌遠而彌盡其力上世羣  
位并燔誌埋壙用備陵谷其苦心慮患靡極不至者  
類此文正公所著禮覽未及塗洗者刻意修潤竟底  
成書敦睦宗族疎遠者咸曰於我乎歸布褐滿座而  
不倦應接是皆孝之推也居家不問產業口不道貨  
財不受非義之饋再赴燕凡係珍貝一物無所隨衣  
不過布帛食不厭蔬糲左右經籍不雜裨書蠶塵滿

室晏如也教子姪御奴僕以義方未嘗叱咤待人悃  
幅無華雖蓬華之士不加以爵位而絕口不及世事  
冲襟曠韻自令人機心淨盡也晚又用工經禮鑽研  
名理詩好陶寫性靈文取辭達理勝讀其稿可知其  
人然自謂不能牢謝文苑之任彌可驗操履安素也  
平生與物無競澹若古井之不波虛舟之自泛以故  
極華顯之位而人不猜闕平陂之會而世無訾然苟  
關名義必止言不諱確而無撓能人之所難能原始  
要終卓然爲一代完人而後承繁衍福祿未艾歷選  
世胄豈與爲京妓乃公之留有餘不盡者於乎休哉

不佞拜華泉公于泉上公時以韋布侍坐訥訥若不能言及公崇貴屢訪我岳麓而不改舊度名論雅識粹然是法拂規矐所以爲文正公肖孫也方公之居留華城不佞勸公納節而遂初泉上用修文正公志業公領可固未忍便訣而意未嘗一日忘也惜哉大成君齋公季氏尚書公所述狀文謁銘于不佞曰斯世知吾先人者惟子在耳願有述焉不佞老閣筆硯而有未敢辭者塞後死責也遂力疾而爲銘銘曰奕奕世胄有屹牛峯忠憲忠肅審審匪躬文正挺生爲世儒宗華泉踐述名實俱隆胚胎前光公又繼聲

維德溫恭維性醇貞孝悌爲本行備家庭釋褐策名颺于明廷翰院奎華文苑銓衡整笏納約君違必爭痛陳時務要殫真誠有濯斯庸有聃斯鳴不激不隨受知聖明胡不黃耆而究厥成瑚璉清瑩芝蘭幽馨是乃輿誦疇敢改評世無耆德用作典刑魚鬚滿堂垂裕遺羸律嶽墨岡血血佳城我辭非諛昭垂千齡

成均進士東湖鄭公墓碣銘 并序○己酉

景廟壬寅兇徒竊國秉誣殺建儲諸臣與己已餘孽合勢表裏和應洋儒金範甲發通三南俾搜罰善

類而逆臣趙德麟繼設兇疏將以誣逼不敢言之地  
收一路名帖于時鄭公諱相詹毅然不撓戒勅子侄  
朋友俾不相關羣醜恚甚因加公逆名而刊籍停舉  
公一門无免者公嘻曰吾輩豈逆也百世之公議森  
巖悉爾輩所爲遂停身藏修及 元陵乙巳中進士  
出入泮宮名節自勵與再從兄萍軒公相說倡議抗  
疏請兩宋先生驟享聖廡再疏略曰今日國賊之得  
罪於 殿下者皆得罪於兩賢者也 殿下之討賊  
惟以明義理正倫常爲先討之以不討欲使懷二心  
者愧服則是固天地之仁而竊恐明義正倫之方猶

不得其本也舉兩賢從祀示萬世標準則倫常自正  
義理自明設淫邪遁不敢蟠踞於太陽時朝廷以辨  
君誣爲第一義雖不及汲於斯文事而向後準請公  
疏啓端云及一鏡就誅而疏下六賊尚未伏法公與  
同志將疏請誅六賊兇徒構毀欲殺道伯俞公拓基  
辨其誣事遂己未幾安陰賊鄭希亮叛一路靡然從  
逆公嘆曰是不可居決意歸洛未及逾嶺被賊黨劫  
略間路還京已而賊平士論颺公微獨將擬獎用而  
被凶徒沮敗公荐哭二子不樂城闔挈家南歸擇勝  
而築扁以東湖草堂率羣子姪講學述詩勉戒佳辰

令節邀致親戚爲花樹會不以世事經心焉公字  
汝良海州人以高麗侍中諱肅爲初祖至貞度公諱  
易入 本朝主文衡贊新化爲 國名臣再傳至直  
提學諱忱值 曾陵禍罔顯有二孫諱希良號虛菴  
諱希儉進士 贈吏曹判書燕山政荒伯氏逃世公  
亦遜于桂陽山中又再傳至忠毅公諱文孚以北評  
事掃清北關有大勳勞當昏朝有扶倫大節是爲公  
高祖曾祖諱大榮生員 贈執義痛忠毅公詩禍避  
世晉州子孫遂世居焉祖諱有祺恪守先訓隱德不  
耀考諱桓司僕寺正妣晉陽姜氏將仕郎塏女公受

學于從叔父 贈大憲公大憲公愛公殊絕教以小  
學四書有所成就侍僕正公疾夜不辭帶及喪持制  
甚嚴事母忠養備至致力追遠宿齋預戒用盡如在  
之誠友弟妹篤摯撫孤姪如己出再從叔露頂公陷  
非辜切於客土公專力庀喪葬隣友違痛公躬親救  
治某人辭謝公曰死生命也竟无恙雅有藻鑑一見  
輒辨邪正後皆不忒病革托子孫於切友呼羣從羣  
姪勉以家聲且曰士大夫當先見識無識則理義不  
明雖讀書千卷不免爲庸人遂以丙辰正月十四日  
卒距其生庚申爲五十七葬于州東琴山里栢谷甲

坐之原配安東權氏牧使字亨女閭範卓越莅饋三十年不以產業累公訓子課僕家法克正生先公缺年歿先公五年合祔公墓有二男學臣通德郎樂臣生員通德子光毅參奉生員子采毅進士參奉子養善亦進士女參判權丕應洪秉穆李廷秀庶女權任中進士子允善女李某尹某養善系子可人女承旨姜泰重庶女柳淵行允善子可信女李奎斗可人子奎元基元女武科權永祜可信二子幼奎元三子基元二女并幼公風儀峻潔規度謹嚴日用常行靡所處而不當固已爲末路偉人而最是明義理扶斯文

爲先立其大者餘皆可略也噫以公抱負沉屈厄窮不少槩見是爲志士之所齎恨者然出而需世則難免乎辛壬之禍而優游邱壑遵養時晦者非不幸而幸也公切後著述及事行俱就湮滅惜哉奎元嘗從余遊具狀謁銘不佞服公風節雅矣遂力疾而爲之

銘銘曰

德可以仁民才足以需世是爲公行治之義諦而衛道闢邪之苦心如日星之昭揭者乃其扶世教之大體歛藏持養如輝山之韞玉幽谷之轉蕙无忝忠毅公家法之正大奮筆爲辭托曠世之神契詔南服之

來裔

可庵崔君墓碣銘

并序○己酉

剛齋宋文簡公講道於鰲村崔君濟默擔笻請學先生叩其所存驚歎曰君是操戈入室者教以經傳各理及爲學之要君彌加策勵先生期許綦重語嶺士曰崔某識博以問於我者問之君服師喪三月曰服之於身未若喪之於心以盡其情不赴舉不與宴樂用盡心制雅言尤翁朱子後一人復雪之計雖不幸不成而天壤間不可一日無此義取朱宋兩先生所傳授一直字揭座右而顧諟是可以知君之爲君也

君字可言學者稱可庵處士系出朔寧以高麗平章事諱天老爲初祖入本朝有大司諫諱卜麟有子諱道源以遺逸拜持平至諱潑諱振寧兩世俱官叅奉叅奉有子僉中樞諱斗南以孝聞給復曾孫諱彥謙贈叅判嘗抗章伸尤庵宋先生冤又請兩宋先生賸享文廟是爲君高祖也有二子同中樞諱昌郁通德郎諱昌義昌義以兄子通德郎諱尚奎爲嗣又無嗣嗣以兄諱尚元子諱光馨光馨娶晉州河氏浩之女舉君君生稟聰慧纒學會史已辨字訛通德公贊以必大門戶及就傳篤志勵業愛看儒先文字長

者以妨時文禁之而不已嘗赴舉于洛有時幸請見君謝曰臨場而訪達官非士也其志氣骯髒如此赴南省不利見士習乖悖歎曰尙可以求進取耶遂廢舉專精爲學端坐對案俯讀仰思凡理藪精奧釋倫常行要會心而驗身因就正于有道折衷于朱子患學者樂混淪而惡分析曰義理有間架條理苟欠辨別何以爲學治家以禮主文公家禮亦有圖式儀節可備家訓性於孝重侍具慶大耋無恙君志物俱養其樂融泄嘗侍王母吮乳作嬰兒戲鄉隣傳頌及喪居瘞盡禮積毀病革聞襟溪李公鳳秀歿貽書士友

曰惜吾有志而不克問業蓋絕筆也以丁未四月二十日歿去其生丁巳爲五十一歲過通德公練祀纜一旬也遠近士友皆相吊哭聲連巷葬于縣東聖子洞未坐醮海州鄭氏教善女忠毅公文孚其先祖也事君子無違舉二男俱歿取弟現默子孝淑爲嗣四女適鄭奎元權宜并鄭煥壽一未笄君質厚而才穎志正而識通篤於倫理設壇祀先墓之失位豎碣章先烈之垂泯蒐輯文獻用闡先徽事世父母處兄弟各盡其道待庶叔有恩恤其子幼失母視護有加用底孚感推及疎屬靡極不至待以舉火者數十家誠

兒少不妄殺一物其恩及肖螟又如此被服尚儉家人欲衣以洋布君貴之曰洋人無父無君豈可服其布乎性愛山水選勝湖嶺儻然有出塵之想嘗築臥龍庵于先壠曰既不諧俗又絕嗣續將以家業付弟抱書藏修以畢吾生未及就而遽沒惜哉所著有質疑錄四書疑義女誡及詩文雜著藏于家噫君奮起南服能自得師篤信好學守死善道乃所矢願而厄於短造罔克志業是爲吾黨之所悼惜也君愛余殊絕余亦愛君負性帶氣卓犖不羣可以大受托以歲寒心期謂我死而累君詎料俾我抱殘生無涯之慟

乎君弟現默以南履穆趙溘兩高士所狀德者謁余以麗牲之辭兩賢非苟譽人者其言宜可信况所湊契者存乎狀文之外者哉遂力疾而爲銘銘曰  
有美一士氣豪才良不扶而直無風而翔本之間學何用不臧篤于孝悌惠于宗族肅于家室準以矩矱不出成教施及鄉陌苟其永年用克展拓庶幾步趨五賢徽躅有始无終視天茫茫有鬱尼岡有恤幽堂秋栢不死志士攸藏載圖不朽昭揭右章用紀南國永垂无疆

耻庵李先生墓碣銘

并序○庚戌



世教衰士以施蠟相高趨細行而激浮譽由是俗益薄而偽益滋若古恥庵李先生求道而不求名隱約以沒世庶幾所謂真學問而歷世既遠尙德者鮮嗚呼可勝恨哉先生諱之濂字養而系出咸豐以高麗神武大將軍諱彥爲初祖入 本朝有莊襄公諱從生平李施愛亂封咸城君高祖諱允字懸監 贈左承旨曾祖諱瑒 贈左贊成祖諱弼元九畹公春元弟也考諱楚玉展力副尉妣全州李氏縣監球女先生生六日而李夫人捐背鞠於外氏寓忠原時伯舅同異堂惕然以本道亞使來觀先生時纔五歲見其

入門下馬愕然語舅氏曰親在堂敢如是乎其天性方嚴自髻鬢已然北渚金公卽外王母從弟也要共其孫同學先生嫌其貴不許未幾并喪王考及繼妣哀毀幾滅性八年中凡四服三年之制并不肯苟受人匍匐必誠必潔一準禮則稍長閱擊蒙要訣至非學問無以爲人茫然自失曰幾誤我一生遂一遵讀書次第專心致精曰粟谷我師也謁慎獨齋金先生講禮而歸自此學益進名益聞同春老峯兩賢上先生行誼於 朝及南溪朴公秉銓除童蒙教官不就肅廟將冊儲 命極選宮僚先生拜副率以世祿之

臣義不敢不膺 命出謝三日而遞後拜 光陵叅  
奉亦暫就而去之壬子老峯兄弟又薦先生經行時  
明比漸盛知士禍將作遁于海西甲寅因別薦陞六  
品拜金吾郎又不就而時事大變人始服先見之明  
自海西移居堤川曰愈恐入山不深壬戌除青山縣  
監 上特賜引見值歲大侵發糶移粟施設有方一  
境賴以全活勤於勸農別儲堅碩而備播種簡民貧  
富計田產多寡賑貸其最無業者凡與利除害蘇殘  
剔瘼一依朱夫子南康故事聚邑子于縣庠臨講經  
禮及小學擊蒙要訣爲文遍喻坊曲在官八月而歸

丁卯又以別薦除歙谷縣令時嶺東饑疫賑濟如青  
山時且縣處僻陋民俗蚩買先生教以五倫四禮且  
廩村秀勸學鄉俗丕變未幾而遞享年六十四而卒  
于辛未正月二十三日衿紳相弔曰仁人亾矣始葬  
于龍仁後遷于水原古等村乾坐配平昌李氏佐郎  
琬其考也溫潤慈和配德無違歿後先生十六年附  
墓左三男二女勛相華相夏相勛相縣監華相過房  
沈世綸閔鎮魯二婿也熹謙謹金致甲崔恒進士宋  
命源婦勛相出休變俞廣基都正宋河源金命重婦  
華相出夏相一子齋外孫閔興洙縣監曾玄并不記

先生氣宇清秀孝友天植雅言先妣以劬勞短折卽  
天地間一罪人居恒慘怛若終身之喪關門端居身  
世兩忘而於世教人物辨認精覈每聞朝廷興作生  
民疾苦輒憂形於色因執友在朝者極言竭論裨益  
弘多莅數邑雖不滿考而規模設施略可見平日抱  
負每見薦曰輒歎曰浮譽所累屢玷刻章將何以稱  
塞輿望乎時儕友俱躋崇顯推先生爲先輩長德莫  
不折輩行稱引倚重而先生自持甚嚴當尤翁造朝  
往省值暮尤翁要同宿先生援馬涑水劉元城故事  
不留而還每與人論辨義理窮極到底不少饒假南

溪以不顧人情事勢戒之先生援朱子說曰着箇道  
理二字便隨衆不得蓋其所養純粹表裏洞徹雖世  
運嬗變淵滕頃刻而茹吐既不隨物緇磷亦不加身  
禍福利害不一動其心常論尤翁大節曰志氣過剛  
而不離正大明尊攘之義而免我左衽禁同姓之昏  
而變我夷俗復 貞陵之號而彝倫復敘是其建天  
地而質鬼神者也及尤翁殉道禍網彌天一言脫口  
觸忤不測而以奠以誅無少忌疑甲寅 大喪在哭  
班尹鑄送子要相見辭不往鑄自來訪先生責以理  
義不少屈不受趙威明之饋不答許穆之間其嚴於

淑慝者如此先生養深積厚其發於辭令者不蹈襲  
前言而橫豎當理嘗言學者要好詞章本領已非爲  
詩韻高格清筆法亦奇勁有文集行于世應 旨萬  
言疏天德王道靡所不該可作永世章程而罔克施  
措文佚不傳惜哉嗚呼先生高才妙齡發軔正路不  
沮不撓所造就者非一善之成名雖謙恭自牧而所  
志未嘗不大富有其具而其道未嘗或枉可爲儒門  
之高蹈 熙朝之完人名位崇卑曷足爲先生輕重  
而世代寢邈將不知有恥庵先生此吾黨尙論者之  
耻也三淵金文康公有云恥庵介特故不顯不顯何

傷先生生而爵祿不入於心况顧身後之名乎然德  
如先生而不傳則世之爲善者怠矣先生後孫副摠  
管應緒將豎碣幽墟謁文于不佞不佞誦慕有素靡  
敢以癘病辭援筆而叙之以見不苟合于時者乃所  
以合乎後世也然合與不合亦何有於先生哉銘曰  
於赫咸豐鍾毓先生涵而俾澤植而俾成濯其光晶  
有燁厥明履道坦坦幽人之貞鑑別賢邪擇精語詳  
祝服大老江漢羹墻安時處順獨懷耿介道積于躬  
用見于世薄試絃歌不辭下位理無精粗崇卑一致  
化民成俗以身爲教廷臣咸言其道可數使陟而升

厥施可大世方仰止曷爲不待不顯者身道則彌光  
糟粕在書微言不喪我庸勸辭鑄諸貞石昭揭千億  
與山無極

贈持平林公墓碣銘

并序

皇明摠兵 本朝節度使林公慶業危忠卓節與日  
星爭光爲華夷所誦慕而公兄諱亨業亦有忠孝大  
節無愧爲二難於乎懿哉公字繼榮平澤人以高麗  
禁侍衛諱得雨爲初祖屢傳至寶文閣大提學諱梓  
司僕寺尹諱台順是生諱整入 本朝禮曹判書選  
清白吏諡恭惠生諱命山吏曹判書是爲公七世祖

也曾祖諱有名司憲府監察 贈戶曹參判祖諱德  
胤 贈戶曹參判考諱篁折衝將軍 贈領中樞府  
事領樞公娶坡平尹氏縣監興智女舉八男公其第  
三也生稟異質誠孝根天竭力供甘旨丙子之亂仲  
兄承業爲孟山守領兵赴戰公獨奉母夫人在衙母  
夫人素善病而憂諸子從軍疾尤甚公夙夜扶將再  
斷指出血和藥幾絕復蘇翌年丁丑遭憂居孟山虜  
騎百餘突至吏驚駭鳥鼠散公守廬獨不去抱柩號  
慟血淚迸出虜噴噴稱歎遂斫木爲牌書孝人不可  
害五字標其門而去旣而歸葬先壠守墓毀粥三年

如一日忠愍公嘗奮大義搗虜虜怒壬午拘致其全家公亦在拘中虜脅令拜跪擬刃者屢公抗聲叱責披腹以示曰剖吾腹觀吾心豈屈於爾者乎左右莫不變色虜亦義之不加害是時 昭顯世子在藩館從官皆目擊稱賞李貞翼公浣記其事閔忠文公鎮厚狀忠愍亦載是語公自甲申後忍痛舍寃因廢舉子業丙午八月十一日卒距其生辛卯爲七十六歲墓于忠州永平洞丑坐有二配漢陽趙氏通政信男女寧越申氏晟女并附公墓有二男重蔓重宣宣傳官澤沃沆金允恭妻庶子淡長房出宣傳繼子沆沃

子廷瑞廷煥廷璋女李鐵萬金夢翊尹海錫沆女柳溥許烈淡子廷圭廷瑛餘不盡記 肅宗庚戌道臣以公壬午瀋庭事聞 命贈司憲府持平 正宗甲辰 命旌其閭曰忠臣孝子之門嗚呼忠孝本無二致傳曰求忠必於孝然世教衰人之成就一節亦難矣公以忠愍爲弟又自樹立入則養生送死誠敬備至俾亂兵感義出則臨不測之虜罵不絕口不撓不逃爲 皇朝全節噫林氏之門何其多賢也親親之恩莫重于孝尊尊之義莫大於忠而公之兄弟能自盡分庶幾兩節并弘二理同極盛矣哉公後孫基寅

從不佞遊謁以牲石之銘不佞不敢辭遂力疾振筆而爲銘曰

忠愍之門又有忠愍是兄是弟篤倫天顯惟厥行治孝悌爲本誠孚異類保護遠觀廬墓泣血幾致毀殉舉族拘虜頭顱自判知死不撓求仁不遠苟遂厥志無愧卞壺死生雖殊各盡其分 聖朝褒旌忠烈孝純肅肅 紫誥煌煌丹門達川祠廟長與近隣棣萼聯輝流芳千春名與月岳同其嶙峋昭揭石章永世不磷

月谷柳公墓碣銘

并序

故副提學醉吃柳公諱滿當昏朝金墉之變抗疏請誅李爾瞻等五賊以扶植彝倫至公會孫諱宗興值明陵已巳 仁顯王后遜位陽谷定齋二公諫而死公起布衣倡率多士瀝血陳章冀回 天心阻禁不克徹公痛哭八山仍鑿迹公車以廢中權君子以爲是祖是孫其揆一也公字振甫高興人也遠祖諱濯麗朝侍中死於直八 本朝司諫諱忠寬有高才盛名二傳至義貞公諱夢寅爲舊君全節世稱夷齊之倫義貞公兄子諱光兵曹叅議卽公曾祖也祖諱之豪陽城縣監考諱蕢以副學公後孫爲縣監公嗣隱

德不仕娶光山金氏別座自鑿女舉公子 孝宗三年壬辰某年月日考終墓于高山月谷卯坐從先兆也配恩津宋氏縣監國士女無育繼配廣州安氏叅奉始泰女配德無違男濟訟請女適李之昇鄭夢良庶子誠諡僉使以諡原從勳 贈公左承旨庶女適金天俊沈恭賢朴鏜孫明漢晶漢進士李普學妻長房出經漢緯漢金薰郡守李普中金齋李在貞妻仲房出奎漢軫漢星漢雲漢金宗海妻李房出曾玄以下并不載公生稟絕異敦孝悌尚義氣及長從寬谷崔公瑞琳學學就行茂士友咸期以遠大逮 聖母

幽辱泣辭 離宮關門晦身至甲戌更化 坤極復正公述詩志喜曰玉自無瑕志自堅翟禕靡主六經年瑤絃夏續南薰柱依舊甲天月再圓泣闕當年不虎身不言今日夏陽春 天恩忽許迎 慈母再乳吾東億萬人其忠愛天植於是焉可見也時羣陰掃盡賢路大闢而公已老兩忘身世惟塞兌息影玩心研理著喪祭禮家訓等書教誨子孫羣行焯焯多可述而撮其大者餘可略也一路誦公名節呼以月谷處士後追配于泰仁之龍溪祠是可驗公議有定也噫人臣事 國母當如事君所在致死而踐斯義者



參寥至吳朴兩賢死而大義始明如公之爲者與兩  
賢何異哉時 天怒震疊設刀鉅以待言者公疏若  
徹則禍必不測而意氣奮發置死生於度外者豈不  
誠強哉矯乎是無愧爲醉吃公肖孫於戲休哉公玄  
孫承旨榮輔請誌公牲石竊感公表臣道扶人紀不  
朽於永世不辭而爲之銘銘曰  
人亦有言先觀大節猗公樹立貴育莫奪瑤華將閉  
矢死奮筆師襄入海自靖以義用晦而明君子之以  
不悔不愠克安素履好學崇禮有本如是我闡幽光  
用賁泉隧非直述公用勗髦士

梧潭權公墓碣銘

并序

嗚呼自 國朝用人分文武爲二塗而韎韁之中鮮  
有自重有耻如古之說禮敦詩焉者而世從以低外  
之是豈眞法制之俾然哉抑其人之有以自取而  
國家邊閫之寄往往有凜然而寒心者若故節度梧  
潭權公其志節行治固足表見永世而若其培植獎  
進於門墻之間得以成就偉器則金溪湖宋櫟泉兩  
先生薰沐之功爲不可誣公諱必稱字子平系出安  
東始祖諱幸有功勝國初以炳幾達權賜姓權氏錫  
胙土安東府爵太師錄壁上勳自後世有名願載史

乘至五世祖諱濤號東溪歷舍檢玉署至大司諫  
贈吏曹判書大提學諡忠康享浣溪書院高祖諱克  
敷曾祖諱斗瞻祖諱是亨考諱壽武妣昌寧曹氏相  
夏女繼妣亦曹氏遇祥女寔育公公自少魁偉有器  
度從事詞賦明經已而自奮曰人顧所樹立如何耳  
苟得爲國家用奚間文武遂從事弓馬登 英廟庚  
午武科試身言書判得銓長獎拔薦宣傳官歷主簿  
都事經歷出爲清州虞侯讀書勸武之暇往來華陽  
水石因及櫟泉宋文元公之門時公已孤惟母夫人  
在堂與諸弟日侍側泊然無進取意以親命黽勉赴

都下聞徐公志修有古大臣風八門納刺公延款鄭  
重而遣之時有一文官在座求縣甚懇公顧語其人  
曰君能無愧於此武弁耶一言不及私可敬也未幾  
有瑞山之除乃徐公所舉也未幾以災年因任繼有  
長馨之除奉母夫人到衙曰縣雖殘薄優養則足矣  
撫字剗斷仁明兩至值歲大侵捐俸以賑之治聲藉  
甚謝紱定居于三山之丈村及丁憂哀毀踰節蔬食  
衰經三年如袒括之初服闋追孝于廟每遇節日設  
饌行茶禮凡兄弟叔姪內外婢僕會一處序列堂上  
下飲食以永夕距舍十里有梧潭水石之勝構茅廬

往處焉手寫周易魯論庸學等書誦讀不輟遠近人士往來叩問殊不知爲舊時將軍也辛卯九月相臣元公仁孫徐公志修登 筵奏曰武臣權必稱讀書林下躬踐實地當以山林儒臣例擢用矣未幾有固城之除於是人或勸處而不出公又不敢以儒自處發行到中路聞銓官因他事遭臺章喜曰人言雖不干我事處義有說矣自此守靜潭舍使受業冠童日行相揖禮坐杏壇命酒逍遙而歸壬辰拜漢湖金文敬公於永同先生因其質問而歎其所見者大以今之朴松堂目之七月除海南縣監百度俱舉而以興

行儒化爲先務癸巳十二月以善治陞資乙未六月拜光陽縣監治規如海南時士民立碑頌之丙申春漢湖先生行鄉飲酒使公處賓席或疑之曰年德章甫在此多矣何取韎韐中人先生曰鄉飲酒大禮也當以知禮者爲賓奚論於文武哉其見重於斯文如此後拜朔州府使依陳先生仙居教條頒示邑民必整帽帶招致父老親自辭釋以諭之又以邊徼重地武備爲重修堞賞射汲汲如不及曰後來者或以爲不關誰知創設之人莫非爲國赤心乎庚子除坡州防禦使以見忤大官不赴任辛丑除昌城防禦使威

望所推不令而行畫七邑山川晝宵靜對蓋有深長  
之慮人不敢測也癸卯拜慶尚左水使營在東萊府  
館倭待變重地也凡於修戰備飭船具勞心殫力靡  
不用極而未幾忽遘疾捐館於營邸時甲辰三月十  
四日也奔走呼號如蜀人之於武侯淑夫人平山申  
氏其考通德郎炆也賢明淑若克配公德咸稱女士  
先公五年生後公十三年歿公始葬芑基至是與夫  
人合窆于三嘉縣南紫霞洞壬坐舉一男焜庶子烜  
庶女適鄭經毅媿子正玄女虞侯鄭善毅張時新朴  
民濟正玄子泰成午成女李龜永午成子宜周正純

及李仁範烜子女公長身豐下風儀儼然平居簡而  
坦溫而淡日用事爲無非儒素家法而當大事執大  
體凜然有不可犯者竊嘗謂子路好勇尚爲聖門高  
第而至其論三德之勇則必以南方之強擬之於君  
子蓋君子之德剛而能柔乃爲成德故也不佞自童  
穉誦慕公不已公從曾孫友成嘗從余遊謁牲石之  
文至心惻款有未忍辭者力疾而爲之銘銘曰

東漢諸將儒雅循循及後名儒有如荀陳吾東絕學  
倡自陶山環嶺以南家墀戶壇公挺其間奮以投筆  
何必呻佔眩名遺實湖符嶺鉞騰蹕非樂樂我故邱

泉石澗壑于漢于泉歸宿師門杏壇絃誦乃舊將軍  
洞彼梧潭水月長照抽關啓鍵默契道妙隨息一編  
嘉惠後人我筆無諛刻示貞珉

孝子文化縣令俞公墓碣銘

并序

萬善百行咸源於孝孝子與造化酬酢如呼吸桴鼓  
故曰惟德動天言孝也非孝無本不謂德也感應之  
理於乎異哉歡城有俞孝子諱彥謙生甫數歲而孤  
及長追服居廬如始喪事徧毋志物俱養母嘗病渴  
息梨公聞華山寺有梨挺身獨往夜黑路險忽有猛  
虎出火若指引然叩禪扉得數顆而歸虎又隨後及

門而止出懷中而進之母渴乃瘳疾革割指嘗糞靡  
極不至居憂哀與禮盡廬墓三年一不跡家門毀瘠  
幾滅性而躬具奠需常有兩虎相守朝夕撒奠與虎  
共食有病僧乞宿公廬兩虎吼逐又有強盜入公田  
攫稻虎啣奪嘗躬汲供祀而嫌并路遠有無源之水  
自湧廬側恒思生時所樂哭拜之間盃酒自乾是所  
云以心感心以誠感誠者也及服闋虎逝泉涸有毀  
公于道伯曰水則古之源泉虎則家之畜豬酒乾者  
漏盃伯躬造公所則虎護廬自若泉出旱土隨汲隨  
送奠酒自乾若有醕者伯驚異之聞于 朝命旌閭

復戶仍轉聞于 皇朝又 命除官時爲 靖陵丙  
戌歲而公年三十一由社稷署叅奉歷奉事直長陞  
主簿轉監察刑曹佐郎正郎戶曹正郎出外典麟蹄  
龍潭新溪文化以嘉靖三十七年戊午十一月一日  
卒于官享年六十三葬于天安貢士洞桂樹峯下寅  
坐公字謙之昌原人以高麗版圖判書演爲初祖入  
本朝有諱輔鼎寔公之考也妣延安李氏樛軒石亨  
其先祖也公有惇德至性而又好讀書行有餘力則  
輒從師友講學公旅宦京邸將卜姓聞其絕美却之  
曰色能伐性君子攸戒也麟蹄有陳復昌庄奴抵罪

當死公斷不容貸爲復昌所罄坎壈者久而不少介  
懷也典四邑一芥不取解紱之日不能舉火配晉州  
姜氏承源之女附公墓舉三男二女敦仁奉事亦薦  
以孝大仁德仁女適金慶祥李天柱奉事子名立又  
以孝薦拜叅奉噫公通神明之孝勵冰檠之操事載  
三綱行實郡守孫汝誠爲公立傳郡守鄭之經圖公  
行治于屏書之者楊蓬萊萬里也土亭李文康公拜  
公 旌閭花潭徐文康公狀公德行打愚李文穆公  
亦爲歌謠述公徽蹟文化人士不忘公遺愛立忠孝  
祠以祀之天安章甫創五賢祠以公配華泉李公采

題其額曰六賢祠淵泉洪公爽周述贊曰馴虎湧泉  
雪筓冰鯉古人所難公實兼美性潭宋文敬公許其  
孝以隣於曾閔 聖朝之褒獎士林之稱述所以歆  
動斯民型範一世者亦至矣嗚呼舉一州一鄉而求  
一人之孝尚或寡矣一家之內以孝廉舉於鄉者祖  
子孫三世亦東華所未有又有奉巾櫛者殉身下從  
亦驗其動化闔庭於乎休哉公後孫學善謂公墓銘  
于不佞不佞素服公懿行致天地協應鬼神効靈有  
所不敢辭者遂爲之銘銘曰

曰惟孝弟本於爲仁卓乎俞公無競伊人其德克明

惟懿惟醇南陔采蘭白華粲粲至誠上格明祇下贊  
僞不可加神不可誣君子之光貞吉有孚丕闡身教  
垂裕子孫孰謂芝醴而無根源四邑絃歌粗跡循良  
有蔚桂岡有恤幽堂過者必式孝子之藏勗哉髦士  
惟公儀刑銘言載珉用詔千齡

僉中樞松庵俞公墓碣銘 并序

穆陵龍蛇之變 乘輿播遷 國步蒼黃昌原俞公  
濬以 宗廟署直長奉 太廟十室神主 列聖傳  
國御寶間關跋涉達于平壤行在所扈 駕龍灣癸  
巳陪 廟主至海州奉安于栢林亭十月還京師陞

拜軍資監正後宗伯及相臣俱言公臨難盡忠之狀人所共覩別施褒錄之典以獎後人恐不容已公既參光國原從又以扈聖勞錄勳後加通政階授僉知中樞府事是爲公立朝大略也公字淑夫祖諱炯贈副提學考諱必成叅奉叅奉公娶白川趙氏縣令瑄女舉公萬曆丙子中司馬荐登薦剡除箕子殿叅奉齊陵叅奉并不就拜厚陵叅奉轉濟用監副奉事宗廟署直長盡忠於壬辰享年八十九而卒于己巳葬于海州茄佐金山亥坐原從先兆也配坡平尹氏校尉瑋女附公墓雙墳公性於孝養親盡

志物居憂嚴禮防及遭內艱喪在安岳距海鄉二百里窮不克反耐權厝外氏先塋公就而廬墓終制公與栗谷李先生共生於臨瀛少先生六歲及長師事先生至心服勤先生居坡州公挈家以從之又從于海州居梨村距石潭數十里往來受業篤志力學退而沉潛闡繹最好小學近思錄未嘗去手被先生稱賞及先生易簀心喪三年先生弟玉山公瑀與公同庚情契最密同門如沙溪重峯守夢諸賢莫不推重公以微官出萬死一生之力保守廟祏於倉卒顛覆之中竭身徇國夷險一節所以勸忠義而警頑鈍



者大矣是乃師教所致於乎懿哉公後孫炳屢抱狀  
而至謁余以不朽之圖篤老垂死倚閣鉛槧而竊感  
公行治真正強病而叙之用附微顯闡幽之義焉銘  
曰  
生養死享終身弗辱乃臨患難矢不忘國惟孝惟忠  
出自惻惻石潭施教因材而篤嗟公踐述淑世善俗  
邵齡勵業慥慥炳燭歸拜九京庶無愧色人或致憾  
位不稱德公無怨尤天命是樂苑彼金岳有拱墓栢  
君子攸藏過者宜式

白川郡守

贈工曹叅議張公墓碣銘

并序

我 昭敬王二十五年倭奴傾國入寇時昇平日久  
民不知兵未旬月而三京失守 國步西遷握節腰  
符者舉皆望風奔潰無敢向賊發一矢時則有張公  
應祺不階一伍之衆不假一節之權威肅義旅躬嬰  
鋒刃卒能獲全海防通問 行朝君子謂當時保障  
之功無讓於張許之守江淮信哉公少有大志膂力  
過人射必命中癸未登武科丙戌捷重試歷幾官而  
拜安城郡守昌寧縣監解紱居家猝聞倭賊甲斐豐  
臣長政攻陷海西十三邑屯兵江陰斷三南之路與  
平壤賊相應公與生員趙光庭僉使宋德潤等百餘

人會盟曰生長禮義之邦涵泳 列聖休養之澤不  
幸值今日卽奮義効忠之秋也圖所以倡義守城時  
前吏曹參議李公廷翰有遺愛于延安而見寓白川  
迎爲主將又送公從姪棟于松禾等邑招募勇士五  
百人繕器械峙糧餉用備戰守事聞 王世子行在  
拜李公海西招討使公亦拜白川郡守時倭酋長政  
聚屯兵犯延城劄鋒甚銳李公命公往探賊勢公匹  
馬單刀馳至楓川橋大喝一聲賊驚疑退軍公緩轡  
而回賊踵公至圍城三匝魁酋負白旗環城旗忽爲  
風所倒公一射殪之卽跳過城斬其馘賊衆蝟集刺

公左腮腮膚下垂公扶腮搏戰殺數十人羣賊駭散  
時有出城亾者公拔劔叱曰食君之祿而見危逃走  
是逆也有效此者當用司馬法一軍股栗受圍七晝  
夜賊百道攻城放鳥銃數千烟焰漲天丸下如雨公  
俟賊攀城矢無虛發撤門扉爲檻縛積草爲炬列釜  
煮湯令男女老弱供役賊堆柴填塹則擲炬以焚之  
賊又用長梯負板則碎以木石注以熱湯無不立斃  
賊起飛樓北山穴板壁臨射則障以土墻賊乘夜霧  
襲城則以炬圍燒盡賊遂焚積屍撤圍而逃公與諸  
勇士分道并出廝殺斬獲甚夥追至反支橋長政以

輕騎向前公與諸勇士斷其後橫戈而叱曰長政長政胡不早降吾且碎汝萬段長政驚曰此漢之樊張是夜長政潛師款城門曰吾知城中無兵器若有可以服我心者明日當載書請成公應聲大罵曰么麼島夷恃其強暴敢圖射天肆虐隣邦恨不啗肉寢皮卽取角弓滿弦一彎便投城下曰汝若能用則用長政挽彎不能羣賊并力俱不得開弦還弓于城上曰吾始知孤城有人歛衆而退李公贊歎曰奚羨睢陽之南雷朝日長政持一櫃來獻曰約以今日請成書在櫃中左右喜欲開視公曰賊謀難測李公命鑿穴

下視則有二賊挾利刀引鉅斬之遂以一刀賜公曰若非景受之言幾陷不測景受公字也長政知其計敗遁至青石鎮忿恚而斃餘賊悉散報捷于行在但言某日圍城某日解去無他語朝廷皆言戰勝不易不伐功尤難此非直李公不要功之義而已甲午除訓練院正乙巳錄宣武原從一等勳後贈通政大夫工曹叅議享年六十五而卒于庚午十月五日墓在法甌山申坐後與李忠穆廷鼐諸賢并享于顯忠祠宣額致侑所褒獎者至矣公初祖大司馬源出自浙江值亂浮海而抵江陵復返于華有子貞弼

又以吏部尚書被誣放東國與金權兩太師贊麗祖  
統合三韓官至進賢殿直提學 贈諡忠獻合享太  
師廟入我 朝有諱續禮曹判書生諱孝智以節孝  
聞 賜田而復之爰宅延安子孫仍世居焉寔公高  
祖也曾祖諱順祖諱潤琰考諱世綱 贈右尹妣  
贈貞夫人清州李氏公配延安李氏男擢秉節校尉  
女適進士李慶長孫男義道縣監信道將仕郎女進  
士李枝白公生稟魁傑纔成童已通經史韎韐進身  
而實心好學家居講性理羣書成就其聲威勳庸者  
豈無所本而然哉噫倡論守城權輿於公且邀李公

主盟如許遠之納張巡運籌謀畫固出於李公而臨  
機殲賊公之功居多蓋無公則無李公無李公則無  
延城無延城則無海西遮蔽海路通 行朝命令于  
湖嶺用成匡復之業者伊誰之力哉公名與李公雙  
垂于無垠於乎懿哉不佞夙服公偉績公後孫景煥  
景周謁麗牲之文老不任筆硯而有不敢終辭銘曰  
律嶽延城積高氣靈靈氣亭毓名將乃生在昔龍蛇  
變寇來洵孰敵王胤有赫張公初奮厥武雄略縱橫  
制勝如神出奇無窮賈勇先登殄滅獯鋒狡酋宵遁  
不敢肆凶全保關防海路自通賴此一着用收全功

何以致之曰義與忠本之則存說禮敦書有鬱甑岡  
光氣上嘘我銘貞珉用闡功德風聲攸感永世不泐

孝子崔公墓碣銘 并序

王祥以後世之言冰魚多矣今崔公光漢之事亦可  
異焉其狀曰公蚤歲以幹蠱失學而性於孝親癢閱  
月不寐兩眦濃眇不少懈考通德郎公諱尚元有疾  
公吞聲飲泣趣辦月制曰他日病革糞甚苦今症不  
甚危而味乃甜滑及遭艱哀毀踰禮祖考同樞公諱  
昌郁邵齡食重蒸餅公具小鍋躬爨息其所嗜備網  
罟求臂鷹擊鮮獲禽未或有乏寢疾嘗思鮒魚公問

藥到渴馬巖時值隆冬忽聞冰下有聲如裂帛扛石  
以投四鮒躍出歸而供之遂引食已疾祖妣張氏失  
明每食飲手匙筋以先之大小便必親負抱未嘗倩  
人躬滌溷具人不得見穢十年如一日事繼妣柳氏  
盡誠人不知不出於其腹祭致其敬每四日食素晬  
日不聽子弟飾喜因心之友靡極不至弟三歲失乳  
乳於隣婦公甚德之終身厚遇其人死爲營葬祭憫  
弟善病必欲分痛嫁諸妹厚其資裝接人不設城府  
人亦不忍欺是皆孝之推也原始要終雖曰未學吾  
必謂之學焉者公其庶幾乎至於冰魚之感則在古

王祥一人而今則不勝其多故人或有疑之者然  
父母寢疾思魚人子思供其親誠孝到底神明感應  
無古今之異則冰魚之異雖家有焉可也况公嗣師  
默孝子也不應誣其親南上舍履穆賢士也不應實  
其誣是其稱述豈不足據以為信也哉公字允明朝  
寧人高麗平章事天老門下侍郎璦價其遠祖也入  
本朝有諱卜麟長諫院道源蔭持平行治見宋剛齋  
所撰墓文僉樞諱斗南以孝蒙 給復之典余嘗銘  
其碣高祖 贈左承旨諱壽嶂曾祖 贈叅判諱彥  
謙嘗與同志直尤齋宋先生之誣妣晉州姜氏震甲

女公以辛巳十月二十四日卒距其生戊子為五十  
四窈于泗川治南洗巖甲坐齊靈光柳氏配公无違  
正倫篤恩生先公七年歿後公九三年墓附一男即  
師默三女咸安趙善孝綾城具錫胤星州李佑甲孫  
孝一孝兢外裔若干人天地間感應莫神於孝行與  
造化酬酢如呼吸桴鼓書曰惟德動天非孝無本不  
謂德也順其德者天必報施是可以執券而責償者  
也銘曰

循彼南陔言采其蘭眷戀庭幃心不遑安白華朱萼  
被于缺薄終缺省匪懈其恪有屹四尺孝子之宅

昭揭石章過者必式

處士慎公墓碣銘 并序

嗚呼居昌慎氏之門世有賢德君子而至樂水公益復垂仁裕德令聞不已有諱復亨諱諱俱以經禮自修爲嶠南之望而拜寢郎不起近又有處士諱性烈以純孝篤學著聞於儒林豈非所謂根深源遠紹先啓後爲一方觀法之賢也歟公生於 英廟己卯甫六歲丁母夫人憂己能致哀盡禮無異成人事繼妣如所生怡愉誠慤無食息間然奉侍大人養拙公嚴敬不懈隔局而寢不敢以趾向親伺候氣息夜無交

睫時鷄鳴起視寒煖仍適母夫人所亦如之朝夕甘旨使夫人親執刀匕不以委人推至從叔父母亦不廢昕夕省謁宗族鄉黨皆薰而化之以其暇從事問學論語小學家禮視如家常茶飯未嘗一日不讀以親老故不赴公車教二弟出入師門兼習明經曰以此榮悅與吾自爲無異也有賢產輒施與賑貸待以舉火者甚多嶺人罕經痘疹時行輒避以免之歲庚申隣里有痘而憚於離側不敢也竟以三月二十七日染痘而卒壽僅四十二遠近士友聞者皆失聲傷盡曰斯人乃至是耶再躡月干支葬于虎音洞坐癸

之原配晉陽姜氏瀕女手檢襲具視終事惟謹入室  
自刎矢心下從賴傷人救甦舅姑泣而詔之曰下從  
固義也然爾夫棄我而死吾夫妻依爾爲命今又棄  
我而死則爾夫亦不瞑目於地下矣孺人慨然曰當  
死而死不死亦命也上舅姑下男女賴余而生夫子  
之所屬托吞米泔而下之強起執中饋竟以後三年  
月日終焉於乎亦烈矣哉四男必祖必瓚必鈺必瓚  
女適鄭塏孫在翰在殷必祖出在翼在爽在嚙在弘  
必瓚出在東必鈺出而必瓚無育以在嚙爲之子曾  
玄以下多不錄公躬修有積壽止中身而孫曾繁衍

有方興未艾之象天道報施其在斯乎慎氏上祖諱  
修自中國來仕高麗文宗時官至司徒左僕射後有  
右贊成諱以衷戶曹叅判諱幾集慶殿直學士諱後  
庚道遙齋諱榮壽樂水亭諱權二世以學行享松陽  
龜淵二祠高祖諱景曄曾祖諱棉祖諱守沉以孝  
贈教官養拙公諱復明以學行聞妣河濱李氏師協  
女此乃公世德之積累者也銘曰  
井渫不食爲我心惻氏居昌慎有是世德德厚流光  
垂裕式穀公修于身歿壽不惑子孫繩繩于後必赫  
嶽嶽虎岡有封如屋我述銘詞用示千億



梅山先生文集卷之三十六

